

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**NACRT**

**ZAKON  
O OBRTU I SRODNIM DJELATNOSTIMA  
U FEDERACIJI BOSNE I HERCEGOVINE**

**Sarajevo, april 2017. godine**

**ZAKON  
O OBRTU I SRODNIM DJELATNOSTIMA  
U FEDERACIJI BOSNE I HERCEGOVINE**

**POGLAVLJE I - OPŠTE ODREDBE**

**Član 1.**

**(Predmet zakona)**

Ovim zakonom uređuju se sadržaj, način i uslovi za obavljanje obrtničke djelatnosti (u daljem tekstu: obrt), srodnih djelatnosti i domaće radinosti, registracija, poslovanje, zajedničko obavljanje i prestanak obavljanja obrta i srodnih djelatnosti, vođenje Obrtnog registra, obrazovanje i osposobljavanje za obavljanje obrta i srodnih djelatnosti, organizovanje obrtnika i lica koja obavljaju srodne djelatnosti i nadzor nad provođenjem ovog zakona i na osnovu njega donesenih propisa.

**Član 2.**

**(Načela zakona)**

Postupak registracije obrta i srodnih djelatnosti zasniva se na slijedećim načelima:

- a) **prioriteta**, koje podrazumijeva da registracijski organ postupa po urednim pojedinačnim zaprimljenim zahtjevima prema redoslijedu njihovog prijema.,
- b) **jednoobraznosti zahtjeva**, koje podrazumijeva da se registracija obrtnika i lica koja obavljaju srodne djelatnosti sprovodi na jedinstvenom obrascu u koji se upisuju odgovarajući podaci radi registracije.,
- c) **formalnosti**, koje podrazumijeva da registracijski organ donosi akte na osnovu podataka iz jedinstvenog obrasca i priloženih dokaza, bez ispitivanja tačnosti činjenica iz jedinstvenog obrasca i vjerodostojnosti priloženih dokaza.,
- d) **javnosti i dostupnosti**, koje podrazumijeva da svako, bez dokazivanja pravnog interesa, može ostvariti neposredan uvid u podatke upisane u Obrtni registar, osim ako javnost i dostupnost nije ograničena posebnim propisom.,
- e) **vremenskog nastanka**, koje podrazumijeva da se podaci vode u Obrtnom registru prema vremenu njihovog upisa.

**Član 3.**

**(Definicije pojmova)**

Pojmovi koji se upotrebljavaju u ovom zakonu imaju slijedeće značenje:

- a) **obrt** je samostalno i trajno obavljanje dopuštenih i registrovanih privrednih djelatnosti u osnovnom, dopunskom ili dodatnom zanimanju od strane fizičkih lica sa ciljem postizanja dobiti koja se ostvaruje proizvodnjom, prometom ili pružanjem usluga na tržištu;
- b) **obrtnik** je fizičko lice koje obavlja djelatnost u svoje ime i za svoj račun, a pritom se može koristiti i radom drugih lica sa kojima je u obavezi zaključiti ugovor o radu u skladu sa propisima iz oblasti radno pravnih odnosa;
- c) **srodne djelatnosti** su sve registrovane privredne i druge djelatnosti koje obavljaju fizička lica prema pravilima obavljanja obrta, a koje se ne smatraju obrtom, uključujući i djelatnosti definisane propisima iz oblasti poljoprivrede;
- d) **proizvodnja** je proizvodnja manjih serija proizvoda uz korištenje mašina i tehničke opreme na način koji isključuje automatizaciju procesa rada i nema obilježja industrijske proizvodnje;

- e) **usluge** obuhvataju popravku i održavanje proizvoda, uređaja, objekata, kao i vršenje ličnih usluga;
- f) **obrtnica** je odobrenje za rad obrta;
- g) **Obrtni registar** je elektronski registar, koji vodi Federalno ministarstvo razvoja, poduzetništva i obrta (u daljem tekstu: Ministarstvo) u koji nadležni organ upisuje registrovane obrte, kao i druge podatke od značaja za praćenje poslovanja obrtnika;
- h) **Registar saglasnosti** za obavljanje djelatnosti koje su regulisane posebnim zakonskim propisima, a mogu se obavljati kao obrt, vodi ministarstvo nadležno za izdavanje saglasnosti za obavljanje tih obrta ovisno o vrsti obrta,
- i) **Nadležna inspekcija** je nadležna općinska (gradska), kantonalna i federalna inspekcija koja vrši inspeksijske poslove u skladu sa svojim ovlaštenjima.

#### **Član 4.**

##### **(Ravnopravnost polova)**

- (1) Zabranjuje se svaki vid diskriminacije, nasilja i uznemiravanja na osnovu pola, jezika, nacionalne pripadnosti, vjeroispovijesti, socijalnog porijekla, obrazovanja, imovnog stanja, političkog i drugog uvjerenja u postupcima propisanim ovim zakonom i propisima donesenim na osnovu ovog zakona.
- (2) Gramatički izrazi upotrijebljeni u ovom zakonu za označavanje muškog ili ženskog roda podrazumijevaju oba pola.

#### **Član 5.**

##### **(Domaća radinost)**

- (1) Domaćom radinosti smatraju se određeni obrti i srodne djelatnosti, za čije obavljanje se ne traži odgovarajuća srednja stručna sprema.
- (2) Domaća radinost je djelatnost izrade i dorade predmeta kod kojih preovlađuje ručni rad i usluge u domaćinstvu.
- (3) Djelatnost domaće radinosti obavlja se samostalno ili uz pomoć članova zajedničkog domaćinstva.
- (4) Obavljanje domaće radinosti upisuje se u Obrtni registar.
- (5) Popis obrta i srodnih djelatnosti koji se mogu obavljati kao domaća radinost propisuje federalni ministar razvoja, poduzetništva i obrta (u daljem tekstu: Ministar) na prijedlog kantonalnih ministarstava nadležnih za oblast obrtništva.

#### **Član 6.**

##### **(Sezonsko obavljanje djelatnosti)**

- (1) Obrti i srodne djelatnosti mogu se obavljati i sezonski najduže devet mjeseci unutar jedne kalendarske godine.
- (2) Obrtnici i lica koja obavljaju srodnu djelatnost iz stava (1) ovoga člana, u vrijeme trajanja sezonskog obavljanja djelatnosti, uspostavljaju svojstvo osiguranika, ako nemaju već zasnovan radni odnos.
- (3) Sezonsko obavljanje obrta i srodne djelatnosti upisuju se u Obrtni registar.
- (4) Popis obrta i srodnih djelatnosti koji se mogu obavljati sezonski propisuje Ministar na prijedlog kantonalnih ministarstava nadležnih za oblast obrtništva.

#### **Član 7.**

##### **(Djelatnost obrta)**

- (1) Dopuštena djelatnost je svaka privredna i druga djelatnost koja nije zakonom zabranjena.

- (2) Pretežna djelatnost obrta je ona djelatnost koja ostvaruje najveće učešće u ukupnom prihodu obrta.
- (3) Pretežnu djelatnost u postupku registracije određuje obrtnik, odnosno lice koje obavlja srodnu djelatnost.

### **Član 8. (Obrti)**

- (1) Obrti su djelatnosti za čije se obavljanje traži odgovarajuća srednja stručna sprema, ovisno o vrsti djelatnosti, propisana zakonom.
- (2) Obrt se može obavljati u stambenim prostorijama, te izvan poslovnih i stambenih prostorija pod uslovima i za djelatnosti koje propisuje Ministar na prijedlog kantonalnih ministarstava nadležnih za oblast obrtništva.
- (3) Ministar pravilnikom propisuje popis obrta.

### **Član 9. (Tradicionalni i stari zanati)**

- (1) Tradicionalni i stari zanati su obrti za koje je potrebno posebno poznavanje zanatskih vještina u obavljanju djelatnosti i koji se obavljaju pretežnim udjelom ručnog rada.
- (2) Vlada Federacije Bosne i Hercegovine (u daljem tekstu: Vlada FBiH), na prijedlog Ministra, a uz prethodno pribavljeno mišljenje jedinica lokalne samouprave i u cilju očuvanja tradicije, donosi uredbu kojom se utvrđuje popis tradicionalnih i starih zanata.
- (3) U cilju očuvanja tradicionalnih i starih zanata i podsticanja interesa za njihovo obavljanje Vlada FBiH, vlade kantona i jedinice lokalne samouprave mogu propisati olakšice, svako iz svoje nadležnosti, i planirati sredstva za finansiranje projekata iz ove oblasti.

## **POGLAVLJE II - OBAVLJANJE OBRTA**

### **1. Uslovi za obavljanje obrta**

#### **Član 10. (Opšti uslovi)**

- (1) Fizičko lice može obavljati obrt kao osnovno zanimanje, ako ispunjava sljedeće opšte uslove:
- a) da je državljanin Bosne i Hercegovine,
  - b) da je poslovno sposobno,
  - c) da mu pravomoćnom sudskom presudom, rješenjem o prekršaju ili upravnim aktom nije izrečena zaštitna mjera zabrane obavljanja obrta, dok ta mjera traje.
- (2) Fizičko lice može obavljati obrt kao dopunsko ili dodatno zanimanje ako ispunjava uslove iz stava (1) ovog člana i ako ima već zasnovan radni odnos po bilo kojem osnovu ili je korisnik penzije u skladu sa članom 12. stav (2) ovog zakona i ukoliko posebnim zakonom nije drugačije propisano.

#### **Član 11. (Posebni uslovi)**

- (1) Ako je zakonom propisana obavezna odgovarajuća srednja stručna sprema za obavljanje određene djelatnosti, pored uslova iz stava (1) člana 10. ovog zakona,

fizičko lice je dužno priložiti i dokaz o posjedovanju odgovarajuće srednje stručne sprema.

(2) Ako zakonom nije propisana odgovarajuća srednja stručna sprema, za obavljanje određene djelatnosti potrebno je da fizičko lice ima najmanje završen treći stepen srednje stručne sprema bilo kojeg smjera ili zanimanja.

(3) Fizičko lice koja ispunjava opšte uslove iz člana 10. ovog zakona, a ne ispunjava uslov srednje stručne sprema može obavljati obrt ako na tim poslovima zaposli voditelja obrta koji udovoljava tom uslovu, što se utvrđuje rješenjem kojim se odobrava obavljanje obrta.

(4) Fizičko lice može obavljati djelatnost ako udovoljava i posebnim zdravstvenim uslovima, kada je to propisano posebnim propisom.

(5) Obrte mogu obavljati i lica sa odgovarajućim višom školskom spremom ili visokom stručnom spremom obrazovanjem u skladu sa odredbama člana 8. stav (1) ovog zakona.

(6) Kantonalni ministar nadležan za oblast obrazovanja, po prethodno pribavljenom mišljenju kantonalnog ministarstva nadležnog za oblast obrta, u spornim slučajevima određuje koja je to odgovarajuća viša školska sprema ili visoka stručna sprema iz stava (5) ovog člana.

(7) Obrt može obavljati i fizičko lice - izumitelj na osnovu ostvarenog patentnog prava na patentirani proizvod ili uslugu ako ispunjava uslove iz člana 10. ovog zakona.

## **Član 12.**

### **(Dopunsko zanimanje)**

(1) Fizičko lice može obavljati obrt kao dopunsko zanimanje isključivo samostalnim radom i to najduže 20 sati sedmično.

(2) Fizičko lice koje je ostavariilo pravo na starosnu penziju, sa 65 godina života ili sa 40 godina penzijskog staža, može istovremeno koristiti penziju i obavljati obrt kao dopunsko zanimanje, i u tom slučaju se ne primjenjuje vremensko ograničenje iz stava (1) ovog člana.

## **Član 13.**

### **(Dodatno zanimanje)**

Fizičko lice može obavljati obrt kao dodatno zanimanje isključivo putem voditelja obrta koji mora biti u radnom odnosu kod vlasnika obrta i ispunjavati uslove iz čl. 10. i 11. ovog zakona.

## **Član 14.**

### **(Strani državljani)**

(1) Strani državljanin može obavljati obrt ako ispunjava uslove iz člana 10. stav (1) tačke b) i c) i člana 11. st. (1) do (6) ovog zakona.

(2) Rješenje kojim se odobrava obavljanje obrta stranom državljaninu proizvodi pravno dejstvo od dana izdavanja radne dozvole u skladu sa propisima kojima se reguliše boravak i radno – pravni status stranih državljana u Bosni i Hercegovini, a vrijedi za vremenski period za koji je ta dozvola izdata.

**Član 15.**  
**(Minimalni uslovi)**

- (1) Obrt se obavlja pod određenim uslovima u pogledu uređenja i opreme poslovnog prostora kao i pod drugim uslovima propisanim ovim zakonom i na osnovu njega donesenim propisima (u daljem tekstu: minimalni uslovi).
- (2) Prostor i oprema za obavljanje obrta, osim minimalnih uslova, moraju udovoljavati i propisima o tehničkoj opremljenosti, zaštiti na radu, zaštiti okoline, zaštiti od buke, zdravstvenim i sanitarnim uslovima, te drugim propisima koji se odnose na obavljanje određene privredne djelatnosti.
- (3) Obrtnik ovjerenom pisanom izjavom potvrđuje ispunjenost uslova i obavještava nadležni organ o početku obavljanja djelatnosti.
- (4) Nadležna inspeksijska redovnim inspeksijskim pregledom utvrđuje ispunjenost uslova iz st. (1) i (2) ovog člana najkasnije 15 dana od dana početka obavljanja djelatnosti.
- (5) Za štetu prouzrokovanu trećim licima izazvanu davanjem neistinite izjave o ispunjenosti uslova obrtnik odgovara cjelokupnom svojom imovinom.
- (6) Za štetu prouzrokovanu trećim licima izazvanu davanjem neistinite izjave o ispunjenosti uslova, dvoje ili više fizičkih lica koji zajednički obavljaju obrt, odgovaraju cjelokupnom svojom imovinom.
- (7) Za štetu nastalu davanjem odobrenja u slučaju neispunjenosti uslova iz st. (1) i (2) ovog člana ili neispunjavanjem roka propisanog stavom (4) ovog člana odgovornost snosi nadležna inspekcija.
- (8) Ministar pravilnikom propisuje minimalne uslove i izgled i sadržaj obrasca izjave o ispunjenosti uslova.
- (9) Izjava obavezno sadrži: podatke o davaocu izjave, podatke o poslovnom prostoru i opremi, pobrojane minimalne tehničke uslove, tekst izjave o ispunjavanju minimalnih tehničkih uslova i posljedicama koje mogu nastupiti usljed davanja neistinite izjave.

**2. Otvaranje obrta**

**Član 16.**  
**(Nadležnost za provođenje zakona)**

Nadležni organ je opštinski, odnosno gradski organ nadležan za oblast obrtništva, koji provodi procedure utvrđene ovim zakonom vezano za izdavanje obrtnice, tradicionalne i stare zanate, domaću radinost i sezonsko obavljanje djelatnosti, početak, privremeno obustavljanje, obavljanje obrta u vidu dopunskog ili dodatnog zanimanja, prestanak obavljanja obrta, kao i obavljanje obrta u izdvojenom prostoru.

**Član 17.**  
**(Rješenje za obavljanje obrta, obrtnica, saglasnost)**

- (1) Za obavljanje obrta obrtnik mora imati obrtnicu.
- (2) Za obavljanje djelatnosti koje su regulisane posebnim zakonskim propisima, a mogu se obavljati kao obrt, obrtnik mora ispunjavati i uslove propisane tim zakonskim propisima i imati saglasnost nadležnog ministarstva za obavljanje obrta.
- (3) Nadležni organ prema sjedištu obrta u roku od sedam dana od dana prijema urednog zahtjeva donosi rješenje kojim se odobrava obavljanje obrta i upisuje obrt u Obrtni registar.
- (4) Nadležni organ po službenoj dužnosti pribavlja dokaz o ispunjavanju uslova iz člana 10. stav (1) tačka c) ovog zakona.

(5) Saglasnost iz stava (2) ovog člana nadležno ministarstvo donosi u roku od sedam dana od dana prijema urednog zahtjeva i upisuje u Registar saglasnosti, a rješenje kojim se odobrava obavljanje obrta proizvodi pravno dejstvo od dana izdavanja saglasnosti.

(6) O izdavanju saglasnosti obrtnik je dužan obavijestiti nadležni organ radi upisa u Obrtni registar.

(7) Pravo na obavljanje obrta stiče se upisom u Obrtni registar.

(8) Nadležni organ obrtniku izdaje obrtnicu, a obrtnik je dužan rješenja iz st. (3) i (5) ovog člana i obrtnicu izložiti u sjedištu obrta, na vidnom mjestu.

(9) Obrtnik može vršiti promjenu podataka u poslovanju obrta, o čemu podnosi zahtjev nadležnom organu, koji promjenu podataka u poslovanju obrta utvrđuje rješenjem i upisuje u Obrtni registar.

(10) Ministar pravilnikom propisuje sadržaj i oblik obrtnice, sadržaj i oblik saglasnosti za obavljanje obrta i sadržaj i oblik odobrenja za obavljanje srodne djelatnosti.

(11) Ministar nadležan za obrte iz stava (2) ovog člana propisuje sadržaj, oblik i način vođenja Registra saglasnosti za te obrte.

## **Član 18.**

### **(Obrtni registar i registarski list)**

(1) Obrt se upisuje u Obrtni registar.

(2) Obrtni registar vodi Ministarstvo, a nadležni organ pristupa mu putem korisničkog imena i šifre dodijeljene od strane Ministarstva.

(3) Registarski list Obrtnog registra sadržava sve potrebne podatke o obrtu i sastavni je dio rješenja iz st. (3) i (5) člana 17. ovog zakona.

(4) U svrhu javnosti podataka Ministarstvo omogućava svim zainteresovanim licama elektronsku pretragu i pregled podataka koji su predmet registracije, u skladu sa posebnim propisima.

(5) Ministar pravilnikom propisuje oblik i način vođenja Obrtnog registra i mogućnosti njegovog korištenja.

## **Član 19.**

### **(Obavljanje djelatnosti bez rješenja)**

(1) Ako nadležni organ u roku iz člana 17. stav (3) ovog zakona ne donese rješenje kojim se odobrava obavljanje obrta ili rješenje kojim se zahtjev odbija, obrtnik može, ako je podnio ovjerenu pisanu izjavu o ispunjenosti uslova, započeti sa obavljanjem obrta, o čemu je dužan prethodno pisanim putem obavijestiti nadležni organ.

(2) Nadležni organ dužan je donijeti rješenje iz člana 17. stav (3) ovog zakona u roku od sedam dana od dana primljene obavijesti iz stava (1) ovog člana i upisati obrt u Obrtni registar.

(3) Ako nadležni organ utvrdi da su navodi izjave o ispunjenosti uslova neistiniti, a obrtnik je započeo raditi na osnovu stava (1) ovog člana, smatra se da se obrt obavlja suprotno odredbama ovog zakona.

## **Član 20.**

### **(Firma obrta)**

(1) Firma je ime pod kojim obrt posluje.

(2) Firma sadrži naziv obrta, ime i prezime obrtnika i sjedište obrta, a može sadržavati i posebne oznake.

(3) Firma ne može sadržavati nazive i oznake koje su u suprotnosti sa važećim propisima i međunarodnim konvencijama.

- (4) Promjenu firme obrtnik je dužan prijaviti nadležnom organu koji o tome donosi rješenje.
- (5) Na firmu obrta primjenjuju se odredbe propisa vezanih za firmu privrednih društava, ako ovim zakonom nije drugačije propisano.
- (6) Obrtnik, odnosno voditelj obrta ili privremeni uposlenik dužan je istaknuti firmu na ulazu u sjedište obrta i izdvojene prostore u kojima se obavlja obrt.

#### **Član 21.** **(Sjedište obrta)**

- (1) Sjedište obrta je mjesto u kojem se obrt obavlja.
- (2) Ako se obrt obavlja na više mjesta, obrtnik određuje sjedište.
- (3) Ako obrtnik mijenja sjedište obrta na teritoriju iste opštine/grada ili na teritoriji druge opštine/grada u istom kantonu, dužan je podnijeti prijavu nadležnom organu na čijoj teritoriji će se nalaziti novo sjedište obrta, uz koju je obavezan priložiti obrtnicu.
- (4) Po konačnosti rješenja o promjeni sjedišta nadležni organ dužan je ovu promjenu unijeti u obrtnicu.
- (5) Ako obrtnik mijenja sjedište obrta na teritoriji opštine/grada u drugom kantonu, dužan je podnijeti prijavu nadležnom organu tog kantona uz koju je obavezan priložiti obrtnicu.
- (6) Nadležni organ koji je donio rješenje o promjeni sjedišta obrta dužan je, po konačnosti tog rješenja, upisati promjenu podataka u obrtnicu i o tome obavijestiti nadležne organe iz člana 23. ovog zakona, kao i nadležni organ koji je prethodno izdao obrtnicu, ako se radi o promjeni sjedišta na teritoriji druge opštine/grada ili drugog kantona.

#### **Član 22.** **(Rok za početak rada)**

- (1) Obrtnik je dužan otpočeti sa obavljanjem djelatnosti najkasnije u roku od 90 dana od dana izdavanja obrtnice.
- (2) Obrtnik je dužan najkasnije u roku od osam dana prije početka obavljanja obrta pisanim putem obavijestiti nadležni organ o početku obavljanja obrta.
- (3) Nadležni organ najkasnije u roku od tri dana od dana prijema obavijesti, obavještava nadležne organe iz člana 23. ovoga zakona.
- (4) Od dana obavijesti iz stava (2) ovog člana obrtniku počinju teći prava i obaveze u skladu sa ovim zakonom i drugim propisima.

#### **Član 23.** **(Dostavljanje rješenja)**

Nadležni organ dužan je nakon upisa u Obrtni registar sva rješenja u vezi sa obavljanjem obrta u roku od tri dana od dana upisa dostaviti: obrtniku, nadležnom poreskom organu, nadležnim inspekcijama, obrtničkoj komori kantona, nadležnom fondu zdravstvenog i penzijskog osiguranja, nadležnoj službi za zapošljavanje i Federalnom zavodu za statistiku.

### **3. Poslovanje obrta**

#### **Član 24.** **(Djelatnosti obuhvaćene obrtnicom i saglasnošću)**



- (1) Obrtnik može obavljati samo one obrte koji su obuhvaćeni obrtnicom i saglasnošću, u slučaju obrta za koje je potrebna saglasnost.
- (2) Ako djelatnost za koju se traži osnivanje obrta nije predviđena važećim propisima nadležni organ odlučuje o upisu bliže određujuće djelatnosti i njenu pripadnost postojećim djelatnostima u skladu sa važećom klasifikacijom djelatnosti i svrstava je u najbliže područje, oblast, granu i razred.
- (3) Obrtnik može obavljati registrovane djelatnosti u vanjskotrgovinskom poslovanju, u skladu sa propisima kojima se uređuje vanjskotrgovinska politika.
- (4) Osim obrta iz stava (1) ovog člana, obrtnik može obavljati i druge djelatnosti koje služe obavljanju djelatnosti koje su obuhvaćene obrtnicom ili se uobičajeno obavljaju uz djelatnost obuhvaćenu obrtnicom.
- (5) Za obavljanje djelatnosti iz stava (4) ovog člana ne mora se ispunjavati uslov srednje stručne spreme.

#### **Član 25.**

##### **(Prodaja proizvoda)**

- (1) Obrtnici prodaju svojih proizvoda mogu obavljati u sjedištu registrovane djelatnosti i u izdvojenom poslovnom postoru.
- (2) Izuzetno, obrtnici mogu prodaju svojih proizvoda obavljati i van prostora iz stava (1) ovog člana, kada je po prirodi same djelatnosti takva prodaja moguća ili uobičajena.

#### **Član 26.**

##### **(Izdvojeni prostori)**

- (1) Obrt kao osnovno ili dodatno zanimanje može se obavljati u više izdvojenih prostora koji se nalaze u sjedištu ili izvan sjedišta obrta i koji moraju udovoljavati uslovima iz člana 15. ovog zakona.
- (2) Pod izdvojenim prostorom podrazumijeva se jedan ili više međusobno odvojenih prostora u kojima se obavlja obrt ili koji služi za obavljanje obrta, a nalazi se u sjedištu ili izvan sjedišta obrta.
- (3) Poslovni prostor može biti stalni, privremeni ili pokretni.

#### **Član 27.**

##### **(Rješenje o izdvojenom prostoru)**

- (1) Nadležni organ izdaje rješenje o obavljanju obrta, odnosno o prestanku obavljanja obrta u izdvojenom prostoru koje se upisuje u evidenciju izdvojenih poslovnih prostora i obavještava nadležni organ u sjedištu obrta radi upisa u Obrtni registar.
- (2) Ukoliko se radi o obavljanju obrta za koji je potrebna saglasnost nadležni organ iz stava (1) ovog člana primjerak rješenja dostavlja nadležnom ministarstvu koje je izdalo tu saglasnost.

#### **Član 28.**

##### **(Vođenje obrta putem voditelja obrta)**

- (1) Obrtnik može obrt voditi sam ili putem voditelja obrta.
- (2) Obrtnik koji obavlja obrt dužan je u svakom izdvojenom prostoru zaposliti voditelja obrta.
- (3) U izdvojenom prostoru u kojem obrtnik obavlja samo promet svojih proizvoda, može uposliti voditelja obrta koji ima završen treći stepen srednje stručne spreme bilo kojeg smjera ili zanimanja.

- (4) Voditelj obrta mora biti u radnom odnosu kod obrtnika i ispunjavati uslove iz člana 10. i člana 11. st. (1) i (2) ovog zakona.
- (5) Voditelj obrta vodi obrt u ime i za račun obrtnika.
- (6) Voditelj obrta odgovoran je za rad obrta u skladu sa ovim zakonom.
- (7) Vođenje obrta putem voditelja obrta obrtnik je dužan prijaviti nadležnom organu na čijem teritoriju se nalazi sjedište obrta.
- (8) Nadležni organ donosi rješenje kojim se utvrđuje vođenje obrta putem voditelja obrta, o čemu se vrši upis u Obrtni registar.

#### **Član 29.**

##### **(Članovi zajedničkog domaćinstva)**

- (1) Članovi zajedničkog domaćinstva mogu u obavljanju obrta pomagati obrtniku.
- (2) Članovima zajedničkog domaćinstva smatraju se:
  - a) bračni partner,
  - b) djeca,
  - c) roditelji,
  - d) usvojenici i usvojitelji,
  - e) pastorčad i lica koje je obrtnik dužan izdržavati.

#### **Član 30.**

##### **(Odgovornost obrtnika)**

- (1) Obrtnik odgovara za zakonitost obavljanja obrta i za zakonitost rada zaposlenika koje zapošljava.
- (2) Za obaveze koje nastanu u obavljanju obrta obrtnik odgovara cjelokupnom svojom imovinom.

#### **Član 31.**

##### **(Izvršenje na imovini obrtnika)**

- (1) Izvršenje radi ostvarenja novčanog potraživanja protiv obrtnika ne može se provesti na onim stvarima i pravima na kojima se protiv njega ne bi moglo provesti kad ne bi obavljao privrednu djelatnost, te na onim stvarima i pravima koja su nužna za obavljanje njegove privredne djelatnosti, ako mu je ona osnovni izvor sredstava za život.
- (2) Izvršenje radi ostvarenja novčanog potraživanja protiv obrtnika ne može se provesti na nekretnini u kojoj izvršenik stanuje u obimu nužnom za zadovoljavanje osnovnih stambenih potreba izvršenika i lica koje je po zakonu dužan izdržavati.
- (3) Ako je povjerilac na osnovu dobrovoljnog pravnog posla s obrtnikom stekao na nekretninama iz stava (2) ovog člana založno ili slično pravo radi osiguranja potraživanja čije prisilno ostvarenje na tom predmetu traži, obrtnik kao izvršenik ne može se protiviti takvom izvršenju pozivajući se na razloge iz stava (2) ovog člana.

#### **Član 32.**

##### **(Dužnosti obrtnika, voditelja obrta, zaposlenika i privremenog zaposlenika)**

Obrtnik, voditelj obrta, zaposlenik ili privremeni zaposlenik dužan je:

- a) odobrenu djelatnost obavljati kvalitetno u skladu sa zakonima, propisima, dobrim poslovnim običajima i poslovnom etikom,
- b) na vidnom mjestu istaći cjenovnik svojih proizvoda, odnosno usluga na način dostupan kupcima, odnosno korisnicima usluga i pridržavati ih se,
- c) na vidnom mjestu istaći radno vrijeme i pridržavati ga se,

- d) kupcu, odnosno korisniku usluga izdati račun o prodatoj robi, odnosno izvršenim uslugama,
- e) garantovati kvalitet proizvoda, odnosno usluga i otkloniti nedostatke ili nadoknaditi pričinjenu štetu kupcu proizvoda, odnosno korisniku usluga u skladu sa važećim propisima i standardima,
- f) voditi uredno evidenciju o obavljanju djelatnosti u skladu sa važećim zakonom i drugim propisima koje donosi Federalno ministarstvo financija,
- g) provoditi propisane mjere zaštite na radu i zaštite okoline koje se odnose na obavljanje registrovane djelatnosti.

### **Član 33.**

#### **(Prenos obrtnice)**

- (1) Obrtnica se ne može prenijeti na drugo fizičko lice, osim ako ovim zakonom nije drugačije propisano.
- (2) Saglasnost iz stava (2) člana 17. ovog zakona ne može se prenijeti na drugo fizičko lice.

### **Član 34.**

#### **(Prenos obrtnice u slučaju smrti obrtnika)**

- (1) Nakon smrti obrtnika obrtnica se može prenijeti na njegove nasljednike, osim u slučaju iz člana 33. stav (2) ovog zakona.
- (2) Lica iz stava (1) ovog člana mogu nastaviti voditi obrt putem voditelja obrta.
- (3) U slučaju iz stava (2) ovog člana nasljednici preuzimaju sve obaveze i odgovornosti iz člana 30. ovog zakona.

### **Član 35.**

#### **(Vođenje obrta nakon smrti obrtnika do prenosa obrtnice)**

- (1) Nakon smrti obrtnika bračni partner, djeca i ostali nasljednici mogu nastaviti voditi obrt do prenosa obrtnice u smislu člana 34. stav (1) ovog zakona, putem privremenog zaposlenika koji mora ispunjavati uslove iz člana 10. i člana 11. st. (1) i (2) ovog zakona.
- (2) Zahtjev za odobrenje za nastavak vođenja obrta putem privremenog zaposlenika podnosi se nadležnom organu u roku od 60 dana od dana smrti obrtnika.
- (3) Privremeni zaposlenik upisuje se u Obrtni registar.
- (4) Privremeni zaposlenik dužan je voditi obrt pažnjom dobrog privrednika za račun nasljednika umrlog obrtnika.
- (5) Ako privremeni zaposlenik postupi suprotno odredbama ovog zakona, za štetu nastalu takvim djelovanjem odgovara u skladu sa odredbama propisa kojim se regulišu obligacioni odnosi.

### **Član 36.**

#### **(Uslovi za prenos obrtnice nakon smrti obrtnika)**

- (1) Ako nasljednici žele prenijeti obrtnicu na sebe nakon smrti obrtnika, te nastaviti voditi obrt putem voditelja obrta, dužni su to prijaviti nadležnom organu u roku od 30 dana od dana okončanja ostavinskog postupka.
- (2) Uz prijavu iz stava (1) ovog člana mora se priložiti:
  - a) izvod iz matične knjige umrlih za preminulog obrtnika,
  - b) pravomoćno Rješenje o nasljeđivanju,

- c) ime i prezime voditelja obrta i dokaz da ispunjava uslove iz člana 10. i člana 11. st. (1) i (2) ovog zakona,
  - d) izjavu nasljednika o saglasnosti vođenja obrta putem voditelja obrta.
- (3) Nadležni organ donosi rješenje i upisuje prenos obrtnice i nastavak vođenja obrta putem voditelja obrta u Obrtni registar.

#### **Član 37.**

##### **(Prenos obrtnice u slučaju gubitka poslovne sposobnosti obrtnika i ostvarivanja prava na starosnu penziju)**

- (1) U slučaju djelimičnog ili potpunog gubitka poslovne sposobnosti ili ostvarivanjem prava na starosnu penziju obrtnika, obrtnica se može prenijeti na njegovog bračnog partnera ili na djecu, osim u slučaju iz člana 33. stav (2) ovog zakona.
- (2) Ukoliko obrtnik nema bračnog partnera, odnosno djecu, obrtnica se može prenijeti na njegove roditelje, odnosno braću ili sestre.
- (3) Lica iz st. (1) i (2) ovog člana mogu nastaviti vođenje obrta putem voditelja obrta.

#### **Član 38.**

##### **(Uslovi za prenos obrtnice u slučaju gubitka poslovne sposobnosti obrtnika ili ostvarivanja prava na starosnu penziju)**

- (1) Lica iz člana 37. st. (1) i (2) ovog zakona koja žele prenijeti obrtnicu na sebe nakon djelimičnog ili potpunog gubitka poslovne sposobnosti obrtnika ili ostvarivanja prava na starosnu penziju obrtnika, te nastaviti voditi obrt putem voditelja obrta, dužni su to prijaviti nadležnom organu u roku od 30 dana od dana pravomoćnosti sudske odluke o oduzimanju poslovne sposobnosti ili 30 dana od konačnosti rješenja kojim se ostvaruje pravo na starosnu penziju.
- (2) Uz prijavu iz stava (1) ovog člana mora se priložiti:
  - a) pravomoćna sudska odluka o oduzimanju poslovne sposobnosti obrtnika ili konačno rješenje kojim se ostvaruje pravo na starosnu penziju,
  - b) ime i prezime voditelja obrta, kao i dokaz da ispunjava uslove iz člana 10. i člana 11. st. (1) i (2) ovog zakona.
- (3) Nadležni organ donosi rješenje i upisuje prenos obrtnice i nastavak vođenja obrta putem voditelja obrta u Obrtni registar.

#### **Član 39.**

##### **(Rokovi za prenos obrtnice)**

Ako lica koja vrše prenos obrtnice uslijed smrti, gubitka poslovne sposobnosti ili ostvarivanja prava na starosnu penziju obrtnika propuste rokove propisane za podnošenje zahtjeva za prenos obrtnice, gube pravo na prenos obrtnice i nastavak vođenja obrta, a obrt prestaje po sili zakona.

#### **Član 40.**

##### **(Raspored radnog vremena)**

- (1) Raspored minimalnog dnevnog i sedmičnog radnog vremena obrtnika kao i minimalno radno vrijeme obrtnika u dane državnih praznika i neradne dane, za pojedine obrte utvrđuje se propisom opštinskog, odnosno gradskog vijeća.
- (2) Opštinsko, odnosno gradsko vijeće za pojedine obrte može propisati raspored početka i završetka dnevnog i sedmičnog radnog vremena.

## **4. Zajedničko obavljanje obrta**

### **Član 41.**

#### **(Međusobni odnosi u zajedničkom obavljanju obrta)**

- (1) Obrtničku djelatnost može zajednički obavljati više fizičkih lica, a najviše deset.
- (2) Međusobni odnosi i odgovornosti lica iz stava (1) ovog člana uređuju se pisanim ugovorom koji ugovorne strane dostavljaju nadležnom organu prilikom upisa u Obrtni registar.
- (3) Na ugovor iz stava (2) ovog člana primjenjuju se propisi koji regulišu obligacione odnose.
- (4) Obrt iz stava (1) ovog člana posluje pod zajedničkom firmom.
- (5) Radi obavljanja obrtničke djelatnosti jedno fizičko lice može obavljati više zajedničkih obrta.

### **Član 42.**

#### **(Uslovi za zajedničko obavljanje obrta)**

- (1) Fizička lica mogu zajednički obavljati obrt ako ispunjavaju uslove iz člana 10. ovog zakona, te da najmanje jedno lice ispunjava i uslove iz člana 11. st. (1) i (2) ovog zakona.
- (2) Strani državljanin može obavljati zajednički obrt ukoliko ispunjava uslove iz člana 14. ovog Zakona.
- (3) Odredbe ovoga Zakona, koje se odnose na obavljanje obrta, kada obrt obavlja fizičko lice, odgovarajuće se primjenjuju i na obrt koji zajednički obavlja više fizičkih lica.
- (4) Zajedničko obavljanje obrta prestaje kada se broj osnivača svede na jednog i u tom slučaju može se izvršiti preregistracija u samostalno obavljanje obrta.

## **5. Prestanak obavljanja obrta**

### **Član 43.**

#### **(Privremeno obustavljanje obavljanja obrta)**

- (1) Obrtnik može privremeno obustaviti obavljanje obrta u trajanju do jedne godine o čemu pisanim putem obavještava nadležni organ najkasnije u roku od sedam dana od dana obustave.
- (2) Izuzetno, obrtnik može obustaviti obavljanje obrta duže od jedne godine, a najduže do tri godine u slučaju bolesti ili nastupa više sile.
- (3) Izuzetno, obrtnik može privremeno obustaviti obavljanje obrta u trajanju do tri godine kada koristi porodiljski dopust do navršene treće godine djetetova života.
- (4) Privremeno obustavljanje obavljanja obrta utvrđuje rješenjem nadležni organ.
- (5) Za vrijeme trajanja privremene obustave obavljanja obrta, obrtnik ne smije obavljati obrt i dužan je predati obrtnicu nadležnom organu.
- (6) O ponovnom početku obavljanja obrta obrtnik je dužan pisanim putem obavijestiti nadležni organ najkasnije u roku od sedam dana po isteku vremena privremene obustave obrta.
- (7) Nadležni organ o privremenoj obustavi, odnosno o ponovnom početku obavljanja obrta obavještava nadležne organe iz člana 23. ovog zakona.

#### **Član 44.**

##### **(Prestanak obavljanja obrta odjavom)**

- (1) Obrtnik je dužan odjaviti obavljanje obrta pisanim putem nadležnom organu prije prestanka rada.
- (2) Prestanak obavljanja obrta utvrđuje rješenjem nadležni organ i po konačnosti rješenja briše obrt iz Obrtnog registra.
- (3) Prestanak obavljanja obrta odjavom utvrđuje se danom navedenim u odjavi, s tim da se obrt ne može odjaviti unazad.
- (4) Ako u odjavi nije naznačen datum prestanka obavljanja obrta, prestanak se utvrđuje danom podnošenja zahtjeva za odjavu obavljanja obrta.

#### **Član 45.**

##### **(Prestanak obavljanja obrta po sili zakona)**

- (1) Obrt prestaje po sili zakona:
  - a) ako obrtnik ne obavlja obrt kao dopunsko zanimanje u skladu sa članom 12. ovog zakona;
  - b) ako obrtnik ne obavlja obrt kao dodatno zanimanje u skladu sa članom 13. ovog zakona;
  - c) smrću, ako se ne nastavi vođenje obrta od strane nasljednika u skladu sa članom 35. ovog zakona;
  - d) gubitkom poslovne sposobnosti obrtnika ili stupanjem u starosnu penziju, ako se vođenje obrta ne nastavi u skladu sa članom 37. ovog zakona;
  - e) ako obrtnik ne započne obavljati obrt u roku od 90 dana od dana upisa u Obrtni registar;
  - f) ako je pravomoćnom odlukom obrtniku izrečena zaštitna mjera zabrane obavljanja obrta za vrijeme dok ta mjera traje;
  - g) ako obrtnik suprotno odredbi člana 43. stav (1) ovog zakona obustavi obavljanje obrta duže od jedne godine;
  - h) ako obrtnik ne započne sa obavljanjem obrta u roku od 30 dana nakon isteka roka privremene obustave obavljanja obrta;
  - i) danom stupanja na izdržavanje kazne, ako obrtnik bude pravomoćnom presudom osuđen na kaznu zatvora u trajanju dužem od šest mjeseci, a nije zaposlio voditelja obrta u skladu sa članom 11. st. (1) i (2) i članom 28. ovog zakona;
  - j) ako se utvrdi da obrtnik ne ispunjava uslove iz čl. 8., 10., 11. i 14. ovog zakona;
  - k) ako obrtnik izgubi državljanstvo Bosne i Hercegovine ili ako stranom državljaninu prestane važiti radna dozvola;
  - l) ako obrtnik ne uskladi poslovanje u roku iz člana 91. stav (1) ovog zakona;
  - m) ako nadležni organ utvrdi da je obrtniku izdana obrtnica na osnovu lažnih isprava;
  - n) promjenom prebivališta u slučaju da je kao sjedište obrta utvrđeno prebivalište obrtnika.
- (2) Kao datum prestanka obavljanja obrta po sili zakona nadležni organ će uzeti vrijeme kada je neosporno utvrdio postojanje jednog od razloga navedenih u stavu (1) ovog člana.

### **POGLAVLJE III - OBAVLJANJE SRODNIH DJELATNOSTI**

#### **1. Uslovi za obavljanje srodnih djelatnosti**

## **Član 46.**

### **(Opšti i posebni uslovi za obavljanje srodnih djelatnosti)**

- (1) Uslovi neophodni za obavljanje srodnih djelatnosti istovjetni su uslovima za obavljanje obrta.
- (2) Fizičko lice može obavljati srodne djelatnosti ako uz opšte uslove iz člana 10. ovog zakona ispunjava i uslov srednje stručne spreme u skladu sa članom 11. st. (1), (2) i (3) ovog zakona.
- (3) Srodne djelatnosti, za čije obavljanje je dovoljno osposobljavanje u trajanju do tri mjeseca i koje ne proizilaze iz nekog obrta, mogu obavljati lica sa završenom najmanje osnovnom školom
- (4) Srodne djelatnosti mogu se obavljati u stambenim prostorijama, te izvan poslovnih i stambenih prostorija pod uslovima i za djelatnosti propisane pravilnikom iz člana 8. stav (2) ovog zakona.

## **2. Obavljanje srodnih djelatnosti**

### **Član 47.**

#### **(Odobrenje za obavljanje srodne djelatnosti)**

- (1) Srodna djelatnost se obavlja u skladu sa odredbama kojim se reguliše obavljanje obrta.
- (2) Za obavljanje srodnih djelatnosti lice koje obavlja srodnu djelatnost mora imati odobrenje nadležnog organa.
- (3) Nadležni organ prema sjedištu djelatnosti u roku od sedam dana od dana prijema urednog zahtjeva donosi rješenje kojim se odobrava obavljanje srodne djelatnosti i upisuje je u Obrtni registar.
- (4) Odobrenje za obavljanje srodne djelatnosti fizičko lice koje obavlja tu djelatnost dužno je izložiti u sjedištu srodne djelatnosti na vidnom mjestu.
- (5) Sadržaj i oblik odobrenja za obavljanje srodne djelatnosti propisuje se pravilnikom iz člana 17. stav (10) ovog zakona.

### **Član 48.**

#### **(Sjedište srodne djelatnosti)**

Ako za obavljanje srodne djelatnosti nije potreban poslovni ili stambeni prostor, sjedište srodne djelatnosti je mjesto u kojem lice koje obavlja srodnu djelatnost ima prebivalište.

## **3. Poslovanje srodnih djelatnosti**

### **Član 49.**

#### **(Poslovanje srodnih djelatnosti)**

Poslovanje srodnih djelatnosti, obavljanje srodnih djelatnosti putem voditelja djelatnosti, prenos srodnih djelatnosti, zajedničko obavljanje srodnih djelatnosti, privremena obustava i prestanak obavljanja srodnih djelatnosti vrše se u skladu sa odredbama kojima je propisan način poslovanja obrta, obavljanje obrta putem voditelja obrta, prenos obrta, zajedničko obavljanje obrta, privremena obustava i prestanak obavljanja obrta.

## **POGLAVLJE IV - OBRAZOVANJE I OSPOSOBLJAVANJE ZA OBAVLJANJE OBRTA I SRODNIH DJELATNOSTI**

### **Član 50.**

#### **(Ustanove za obrazovanje)**

Obrazovanje za obavljanje obrta i srodnih djelatnosti za koje se traži odgovarajuća stručna sprema vrši se u osnovnim i srednjim školama, visokoškolskim ustanovama i ustanovama za obrazovanje odraslih.

### **Član 51.**

#### **(Majstorski ispit)**

(1) Obrazovanje za obavljanje obrta za koje se može polagati majstorski ispit izvodi se prema programu koji donosi kantonalni ministar nadležan za oblast obrazovanja na prijedlog srednje stručne škole ili ustanove za obrazovanje odraslih i Obrtničke komore Federacije Bosne i Hercegovine (u daljem tekstu: Komora).

(2) U izradi prijedloga programa Komora učestvuje samo u formuliranju praktičnog dijela majstorskog ispita.

(3) Majstorskom ispitu mogu pristupiti lica koja su završila odgovarajuću srednju stručnu školu, odnosno odgovarajući javno važeći obrazovni program i imaju najmanje dvije godine radnog iskustva u obrtu za koji žele polagati majstorski ispit, kao i lica sa neodgovarajućom srednjom stručnom školom i najmanje pet godina radnog iskustva u obrtu za koji žele polagati majstorski ispit.

### **Član 52.**

#### **(Komisija za polaganje majstorskog ispita)**

(1) Majstorski ispit polaže se pred komisijom koju osniva srednja stručna škola verifikovana za te poslove, odnosno ustanova za obrazovanje odraslih, u skladu sa važećim propisima iz oblasti odgoja i obrazovanja u saradnji sa obrtničkom komorom kantona (u daljem tekstu: kantonalna komora).

(2) Komisija se sastoji od najmanje pet članova, od kojih su najmanje dva člana majstori obrta za koji se polaže majstorski ispit.

(3) Majstore u komisijama za polaganje majstorskog ispita imenuje nadležna kantonalna komora.

(4) Nakon uspješno položenog majstorskog ispita majstoru se izdaje diploma o majstorskom zvanju.

(5) Srednja stručna škola, odnosno ustanova za obrazovanje odraslih, koja je osnovala komisiju za polaganje majstorskog ispita vodi evidenciju o položenim majstorskim ispitima i dužna je dostaviti nadležnoj kantonalnoj komori izvod iz evidencije o položenim majstorskim ispitima u roku od 15 dana od dana polaganja majstorskog ispita.

(6) Ministar pravilnikom propisuje način polaganja majstorskog ispita, sadržaj i oblik diplome iz stava (4) ovog člana, te popis zanimanja za koja se može polagati majstorski ispit.

### **Član 53.**

#### **(Troškovi ispita i nadzor nad provođenjem ispita)**

(1) Troškove majstorskog ispita snosi polaznik.

(2) Ministar, na prijedlog Komore, rješenjem utvrđuje cijenu polaganja majstorskog ispita.



(3) Nadzor nad zakonitošću organizovanja i provođenja majstorskih ispita provodi Ministarstvo i kantonalno ministarstvo nadležno za oblast obrazovanja.

## **POGLAVLJE V - ORGANIZOVANJE OBRTRNIKA I LICA KOJA OBAVLJAJU SRODNE DJELATNOSTI**

### **Član 54.**

#### **(Oblici udruživanja)**

- (1) Oblici udruživanja obrtnika i lica koja obavljaju srodne djelatnosti su:
  - a) udruženje obrtnika,
  - b) udruženje lica koja obavljaju srodne djelatnosti,
  - c) obrtnička komora kantona i
  - d) Obrtnička komora Federacije Bosne i Hercegovine.
- (2) Oblici udruživanja iz stava (1) ovog člana čine jedinstveni sistem organizovanja obrtnika i lica koja obavljaju srodne djelatnosti.

### **Član 55.**

#### **(Članstvo)**

- (1) Obrtnici i lica koja obavljaju srodne djelatnosti danom upisa u Obrtni registar postaju članovi kantonalne komore na čijem teritoriju se nalazi njihovo sjedište.
- (2) Fizička lica iz stava (1) ovog člana obavezna su plaćati članarinu.
- (3) Kontrolu naplate članarine vršit će nadležni poreski organ u skladu sa ovlaštenjima utvrđenim poreskim propisima.
- (4) Ministar, po prethodno pribavljenom mišljenju Komore, u spornim slučajevima određuje koje srodne djelatnosti potpadaju pod oblike udruživanja propisane ovim zakonom.
- (5) Ministar, na prijedlog Komore, pravilnikom propisuje visinu i način raspodjele članarine između udruženja obrtnika i udruženja lica koja obavljaju srodne djelatnosti, kantonalnih komora i Komore.

### **1. Udruženje obrtnika i udruženje lica koja obavljaju srodne djelatnosti**

### **Član 56.**

#### **(Udruženje obrtnika)**

- (1) Obrtnici radi unapređivanja, usaglašavanja i ostvarivanja zajedničkih interesa na određenom području osnivaju udruženje obrtnika.
- (2) Udruženje obrtnika može se osnovati na stručnom principu.
- (3) Za svaki obrt na određenom području može biti osnovano samo jedno udruženje obrtnika ovlašteno da nosi oznaku u vezi sa obrtom za koji je osnovano.
- (4) Područje iz stava (3) ovog člana obuhvata područje jedne ili više jedinica lokalne samouprave na teritoriju jednog kantona.
- (5) U spornim slučajevima teritorijalni obuhvat udruženja obrtnika određuje kantonalna komora na čijem području udruženje obrtnika ima sjedište.
- (6) Udruženje obrtnika je pravno lice, koje pravni subjektivitet stiče registracijom u nadležnom kantonalnom organu, u skladu sa propisima kojima su definisani uspostavljanje i rad udruženja i fondacija.
- (7) Komora propisuje način provođenja izborne procedure u udruženjima obrtnika.

## **Član 57.**

### **(Koordinacija rada udruženja)**

- (1) Koordinaciju rada udruženja obrtnika vrši kantonalna komora na čijem području udruženja obrtnika imaju sjedište.
- (2) Koordinacija se odnosi na praćenje ispunjavanja zakonom i statutom propisanih ciljeva udruženja i obavljanje povjerenih zadataka.

## **Član 58.**

### **(Članstvo u udruženju obrtnika)**

- (1) Obrtniku ne može biti uskraćeno pravo učlanjenja u udruženje obrtnika ako ispunjava uslove propisane ovim zakonom i statutom.
- (2) Obrtnik koji obavlja više obrta, može se učlaniti u sva udruženja obrtnika osnovana za te obrte.
- (3) Članom udruženja obrtnika može postati i pravno lice sa područja udruženja koje obavlja istu ili sličnu djelatnost kao obrt za koji je udruženje obrtnika osnovano.

## **Član 59.**

### **(Statut)**

- (1) Udruženje obrtnika ima svoj statut kojim su regulisani ciljevi udruženja, teritorijalni obuhvat, organi upravljanja i njihov sastav, nadležnosti, pravni odnosi njegovih članova i druga pitanja od značaja za njegov rad.
- (2) Na sadržaj statuta primjenjuju se odredbe ovog zakona i propisa koji regulišu rad udruženje i fondacija.
- (3) Kantonalna komora na čijem teritoriju udruženje obrtnika ima sjedište, daje saglasnost na statut udruženja.

## **Član 60.**

### **(Raspolaganje imovinom)**

O raspolaganju imovinom udruženja obrtnika, a naročito o sticanju, otuđivanju ili stvarnom zaduživanju osnovne imovine, otuđivanju predmeta koji imaju istorijsku, naučnu ili umjetničku vrijednost, odobravanju podizanja kredita i investiranju imovine udruženja obrtnika, odlučuje skupština udruženja uz saglasnost kantonalne komore na čijem teritoriju udruženje ima registrovano sjedište

## **Član 61.**

### **(Fond uzajamne pomoći)**

- (1) Udruženje obrtnika može formirati fond uzajamne pomoći, čiji rad se uređuje posebnim opštim aktom.
- (2) Saglasnost na opšti akt iz stava (1) ovog člana daje kantonalna komora na čijem teritoriju udruženje obrtnika ima sjedište.
- (3) Prihodi i rashodi ovog fonda moraju se voditi na odvojenom računu i koristiti se u propisane svrhe odvojeno od ostalih sredstava udruženja obrtnika.

## **Član 62.**

### **(Prestanak rada udruženja)**

Kantonalna komora kod nadležnog kantonalnog organa pokreće postupak za prestanak rada udruženja obrtnika:

- a) ako je ugrožen zajednički interes obrtnika zbog nezakonitog postupanja organa upravljanja;

- b) ako djeluje na način koji je u suprotnosti sa zakonom ili statutom;
- c) ako je ugroženo ispunjavanje zakonom i statutom propisanih ciljeva zbog značajnog smanjenja broja članova.

### **Član 63.**

#### **(Udruženje lica koja obavljaju srodne djelatnosti)**

Na udruženje lica koja obavljaju srodne djelatnosti odgovarajuće se primjenjuju odredbe kojim je regulisano osnivanje, rad, članstvo, akti i prestanak rada udruženja obrtnika.

## **2. Kantonalne komore**

### **Član 64.**

#### **(Kantonalne komore)**

- (1) Kantonalne komore osnivaju se u cilju zastupanja interesa svih obrtnika i lica koja obavljaju srodne djelatnosti na području jednog kantona.
- (2) Kantonalna komora je pravno lice, koje pravni subjektivitet stiče registracijom kod nadležnog suda.
- (3) Obrtnici i lica koja obavljaju srodne djelatnosti na području kantona danom upisa u Obrtni registar postaju članovi kantonalne komore.
- (4) Članom kantonalne komore mogu postati i privredna društva, kao i druga pravna lica osnovana u skladu sa važećim propisima.

### **Član 65.**

#### **(Statut)**

- (1) Skupština kantonalne komore donosi statut kojim se utvrđuju ciljevi, organizacija i način djelovanja kantonalne komore, organi upravljanja i njihov sastav, vodeći računa o nacionalnoj zastupljenosti, nadležnosti, pravni odnosi njenih članova, kao i druga pitanja od značaja za njihov rad, u skladu sa odredbama ovog zakona i opštim aktima Komore.
- (2) Saglasnost na statut kantonalne komore daje vlada kantona na čijem području se nalazi sjedište kantonalne komore.
- (3) Statut se objavljuje na službenoj internet stranici kantonalne komore.

### **Član 66.**

#### **(Sastav skupštine kantonalne komore)**

- (1) Skupština se sastoji od izabраниh članova.
- (2) Statutom se propisuje ukupan broj članova skupštine i broj članova koji dolaze iz pojedinih udruženja koja se nalaze na teritoriju kantonalne komore, vodeći računa o privrednim specifičnostima i značaju pojedinih djelatnosti.
- (3) Ministar pravilnikom propisuje način provođenja izbornog postupka u kantonalnim komorama i Komori.

### **Član 67.**

#### **(Sud časti)**

- (1) U okviru kantonalne komore djeluje sud časti.
- (2) Sud časti vodi postupke i odlučuje o povredama poslovnih običaja, ugovora, tržišnih pravila i drugih propisa.

(3) O žalbama protiv odluka suda časti kantonalne komore rješava Sud časti Komore.

(4) Statutom i drugim opštim aktima kantonalne komore utvrđuje se organizacija, sastav, način izbora, mjere koje može izreći, postupak i druga pitanja od značaja za rad suda časti.

#### **Član 68.**

##### **(Transparentnost)**

Odluke kantonalne komore o utvrđivanju budžeta, uključujući plan raspodjele, odobravanju izdataka koji nisu predviđeni budžetom, ovlaštenjima za podizanje kredita i stvarnim opterećenjima nepokretne imovine, donošenju propisa o raspolaganju budžetom, kasom i računom, kontroli i prihvatanju završnog godišnjeg računa i o tome koja nezavisna institucija treba izvršiti kontrolu završnog godišnjeg računa, te sticanju i prodaji nepokretne imovine, objavljuju se na službenoj internet stranici kantonalne komore.

#### **Član 69.**

##### **(Koordiniranje rada kantonalnih komora)**

(1) Komora koordinira rad kantonalnih komora.

(2) Koordinacija se odnosi na praćenje zakonitosti rada, donošenje akata i njihovu primjenu.

#### **Član 70.**

##### **(Primjena odgovarajućih odredbi)**

Na kantonalne komore odgovarajuće se primjenjuju odredbe kojima se reguliše uspostavljanje fonda uzajamne pomoći, ciljevi, akti i organi upravljanja Komore, te primjena principa ravnopravnosti spolova.

### **3. Komora**

#### **Član 71.**

##### **(Komora)**

(1) Komora je samostalna, stručno – poslovna organizacija obrtnika i lica koja obavljaju srodne djelatnosti, koja se osniva radi usaglašavanja i zastupanja zajedničkih interesa članova Komore, a kojoj je ovim zakonom povjereno vršenje javnih ovlaštenja.

(2) Komora predstavlja i zastupa obrtnike i lica koja obavljaju srodne djelatnosti u zemlji i inostranstvu.

(3) Komora je pravno lice, koje pravni subjektivitet stiče registracijom kod nadležnog suda.

(4) Rad Komore je javan.

#### **Član 72.**

##### **(Članstvo u Komori)**

(1) Obrtnici i lica koja obavljaju srodne djelatnosti na teritoriji Federacije BiH, u skladu sa ovim zakonom, članovi su Komore putem kantonalnih komora.

(2) Članom Komore mogu postati i privredna društva, kao i druga pravna lica osnovana u skladu sa važećim propisima.

(3) Evidencija članova Komore je javna knjiga na osnovu koje se izdaju odgovarajuća uvjerenja koja imaju snagu javne isprave.

**Član 73.**  
**(Ciljevi Komore)**

Komora ima sljedeće ciljeve:

- a) unapređuje obrt i srodne djelatnosti;
- b) razvija kantonalne komore u okviru poslova i zadataka utvrđenih ovim zakonom i Statutom Komore;
- c) zastupa interese svojih članova pred organima federalne vlasti i tijelima federalne državne uprave;
- d) daje primjedbe i prijedloge organima federalne vlasti i tijelima federalne državne uprave pri donošenju propisa od interesa za svoje članove;
- e) obavlja poslove iz područja obrazovanja i osposobljavanja za potrebe obrtništva propisane ovim zakonom;
- f) vodi evidenciju članova Komore;
- g) vodi evidenciju kantonalnih komora;
- h) podstiče, koordinira, pomaže i prati provođenje osnovnih programskih zadataka u udruženjima i kantonalnim komorama;
- i) donosi propis o izbornoj proceduri u udruženjima obrtnika i udruženjima lica koja obavljaju srodne djelatnosti;
- j) procjenjuje mogućnosti i uslove privrednog razvoja od interesa za svoje članove;
- k) uspostavlja i razvija poslovne odnose na domaćem i inostranom tržištu;
- l) podstiče inovacije postupaka, proizvoda i usluga, kao i razvoj tehnološke infrastrukture;
- m) podstiče, razvija i štiti dobre poslovne običaje, poslovni moral i zaštitu potrošača;
- n) pruža pomoć članovima prilikom osnivanja i obavljanja djelatnosti;
- o) razvija informacioni sistem, te informiše članove o stručnim, poslovnim i tehnološkim pitanjima i novostima iz djelokruga rada Komore putem časopisa Komore i drugih sredstava javnog informisanja;
- p) obavlja i druge poslove utvrđene ovim zakonom i statutom.

**Član 74.**  
**(Statut Komore)**

(1) Skupština Komore donosi statut u kojem se utvrđuje organizacija i način djelovanja Komore, na koji saglasnost daje Vlada FBiH.

(2) Statut Komore sadrži odredbe o:

- a) imenu i sjedištu Komore;
- b) pečatu Komore;
- c) javnim ovlastima Komore;
- d) broju predstavnika kantonalnih komora u Skupštini Komore;
- e) zadacima i poslovima Komore;
- f) pravima, obavezama i odgovornostima članova Komore;
- g) saradnji sa organima federalne vlasti i tijelima federalne državne uprave;
- h) saradnji sa komorama u zemlji i inostranstvu i sa međunarodnim organizacijama;
- i) izboru upravnih tijela Komore i njihovim ovlaštenjima;
- j) stručnim savjetima Komore;
- k) sazivanju Skupštine Komore i njenih tijela;
- l) formi rješenja i dokumentovanja odluka Komore i upravnih tijela;
- m) izradi srednjoročnog finansijskog plana i njegovoj prezentaciji na Skupštini;

- n) predlaganju i odobravanju budžeta;
  - o) izradi, kontroli i prihvatanju završnog godišnjeg računa i prenošenju ovlasti za kontrolu tog računa na nezavisnu instituciju izvan Komore;
  - p) pretpostavkama i formi izmjene Statuta;
- (3) Statut Komore se objavljuje na službenoj internet stranici Komore.

### **Član 75. (Organi upravljanja)**

Organi upravljanja u Komori su:

- a) Skupština,
- b) Upravni odbor
- c) Nadzorni odbor
- d) Predsjednik i potpredsjednik

### **Član 76. (Skupština Komore)**

- (1) Skupština Komore donosi:
- a) Statut i izmjene i dopune Statuta,
  - b) Poslovnik o radu Skupštine,
  - c) program rada i finansijski budžet, uključujući plan raspodjele, odobravanje izdataka koji nisu predviđeni budžetom, ovlaštenja za podizanje kredita i stvarna opterećenja nepokretne imovine,
  - d) odluku o visini obavezne članarine, način obračuna, rokove i način naplate članarine koja na godišnjem nivou ne može iznositi više od 1% osnovice za obračun doprinosa koju objavljuje Federalno ministarstvo finansija,
  - e) odluku o raspodjeli članarine,
  - f) propise o raspolaganju budžetom, kasom i računom,
  - g) propis o sticanju i prodaji nepokretne imovine,
  - h) odluku o raspisivanju i provođenju izbora predstavnika Komore,
  - i) Pravilnik o organizaciji, sastavu, načinu izbora i nadležnosti Suda časti, te o postupku i mjerama koje on može izreći,
  - j) pravila o dobrim poslovnim običajima za određena zanimanja,
  - k) ostale akte koji nisu u nadležnosti upravnih tijela Komore.
- (2) Skupština Komore utvrđuje:
- a) jedinstvenu politiku finansiranja cjelokupnog komorskog sistema,
  - b) koja nezavisna institucija treba izvršiti kontrolu završnog godišnjeg računa.
- (3) Skupština Komore prihvata završni godišnji račun i izvještaj o radu.
- (4) Skupština Komore usklađuje rad i razvoj kantonalnih komora.
- (5) Skupština Komore imenuje i razrješava:
- a) predsjednika i potpredsjednike Komore,
  - b) Upravni odbor, Nadzorni odbor i druga radna tijela Skupštine.
- (6) Odluke donesene u skladu sa stavom (1) tačke (a), (c), (e) i (f) objavljuju se na službenoj internet stranici Komore.

### **Član 77. (Sastav Skupštine Komore)**

- (1) Skupštinu Komore čine izabrani članovi.
- (2) Statutom Komore se propisuje broj članova Skupštine i njihova raspodjela na kantonalne komore.

(3) Pri raspodjeli će se voditi računa o privrednim specifičnostima i privrednom značaju pojedinih djelatnosti, kao i o ravnopravnoj zastupljenosti kantona u odnosu na broj članova kantonalne komore.

**Član 78.**  
**(Upravni odbor Komore)**

Upravni odbor Komore:

- a) provodi odluke i zaključke Skupštine
- b) utvrđuje prijedlog Statuta i drugih akata koje donosi Skupština
- c) predlaže odluke i stavove, te daje mišljenje o pitanjima o kojima raspravlja Skupština
- d) obavlja i druge poslove propisane Statutom i ovim zakonom.

**Član 79.**  
**(Nadzorni odbor Komore)**

Nadzorni odbor Komore nadzire provođenje Statuta i drugih opštih akata Komore, materijalno – finansijsko poslovanje i raspolaganje sredstvima, te obavlja i druge poslove predviđene Statutom.

**Član 80.**  
**(Predsjednik i potpredsjednici Komore)**

- (1) Komora ima predsjednika i dva potpredsjednika Skupštine i predsjednika i dva potpredsjednika Komore koji se imenuju na period od četiri godine.
- (2) Predsjednik i potpredsjednici iz stava (1) ovog člana biraju se iz reda različitih konstitutivnih naroda i te funkcije mogu obavljati u najviše dva mandata.
- (3) Predsjednik i potpredsjednici vrše svoje funkcije u međusobnoj koordinaciji.
- (4) Predsjednik Komore predstavlja i zastupa Komoru

**Član 81.**  
**(Sud časti)**

- (1) Pri Komori se osniva i djeluje Sud časti.
- (2) Sud časti odlučuje o povredama dobrih običaja u obavljanju obrta, o neizvršavanju obaveza članova i o povredama Statuta i drugih akata Komore.

**Član 82.**  
**(Ravnopravnost spolova)**

Prilikom imenovanja članova organa upravljanja, komisija i drugih organa oblika udruživanja koji proizlaze iz ovog zakona, vodi se računa o ravnopravnoj zastupljenosti oba spola.

## **POGLAVLJE VI – UPRAVNI NADZOR**

**Član 83.**  
**(Upravni nadzor)**

Upravni nadzor nad provođenjem ovog zakona i propisa donesenih na osnovu ovog zakona vrši Ministarstvo.

**Član 84.**  
**(Inspekcijski nadzor)**

- (1) Inspekcijske poslove u provedbi ovog zakona i propisa donesenih na osnovu ovog zakona vrši nadležna inspekcija koja će u radu primjenjivati svoje propise.
- (2) Sva akta koja donese inspekcija iz stava (1) ovog člana dostavljaju se nadležnom organu radi kontrole i utvrđivanja prestanka rada po sili zakona.

**Član 85.**  
**(Obavljanje djelatnosti bez obrtnice, saglasnosti ili odobrenja)**

- (1) Ako se obrt obavlja bez obrtnice ili bez saglasnosti ili se srodna djelatnost obavlja bez odobrenja, odnosno ako se obrt obavlja suprotno obrtnici ili saglasnosti ili se srodna djelatnost obavlja suprotno odobrenju, nadležna inspekcija donosi rješenje o zabrani obavljanja obrta ili srodne djelatnosti i zabranjuje upotrebu uređaja i opreme kojima se obavlja obrt ili srodna djelatnost.
- (2) U slučajevima iz stava (1) ovog člana žalba protiv rješenja ne odgađa izvršenje rješenja.

**Član 86.**  
**(Neispunjavanje minimalnih uslova)**

- (1) Ako prostor i oprema obrtnika ili lica koje obavlja srodnu djelatnost ne zadovoljava propisane uslove, navedene u izjavi o ispunjenosti uslova, nadležna inspekcija donosi rješenje kojim se određuje rok, ne duži od 15 dana, u kojem se nedostaci moraju otkloniti.
- (2) Ako se nedostaci iz stava (1) ovog člana ne otklone u ostavljenom roku, nadležna inspekcija kaznit će prekršioca minimalnom kaznom iz člana 87. stav (1) ovog zakona i donijet će rješenje kojim će odrediti novi rok u kojem se nedostaci moraju otkloniti.
- (3) Ako obrtnik ili lice koje obavlja srodnu djelatnost ne ispoštuje rok iz stava (2) ovog člana, nadležna inspekcija donosi rješenje o zabrani obavljanja određene djelatnosti, o zatvaranju prostora, odnosno o zabrani upotrebe uređaja i opreme.
- (4) U slučaju povrede sanitarno – zdravstvenih i tehničkih uslova zbog kojih mogu nastati teže posljedice po zdravlje i život ljudi, nadležna inspekcija donosi rješenje kojim se odmah zabranjuje obavljanje te djelatnosti dok se utvrđeni nedostaci ne otklone.
- (5) U slučajevima iz st. (2) i (3) ovog člana žalba protiv rješenja ne odgađa izvršenje rješenja.

**POGLAVLJE VII - PREKRŠAJNE ODREDBE**

**Član 87.**

- (1) Novčanom kaznom u iznosu od 1.000,00 KM do 3.000,00 KM kaznit će se obrtnik ili lice koje obavlja srodnu djelatnost ako:
- a) obrt ili srodnu djelatnost obavlja sezonski u vremenu u kojem nije registrovan za sezonsko obavljanje djelatnosti (član 6. stav (1) ovog zakona);
  - b) ne obavlja obrt ili srodnu djelatnost kao dopunsko zanimanje isključivo svojim radom (član 12. stav (1) ovog zakona);
  - c) ne izloži obrtnicu ili odobrenje za rad u sjedištu obrta ili djelatnosti na vidnom mjestu (član 17. stav (8) i član 47. stav (4) ovog zakona);
  - d) ne istakne firmu pod kojom će obrt ili srodna djelatnost poslovati (član 20. stav (6) ovog zakona);



- e) odobrenu djelatnost ne obavlja kvalitetno u skladu sa zakonima, propisima, dobrim poslovnim običajima i poslovnom etikom (član 32. stav (1) tačka a) ovog zakona);
- f) na vidnom mjestu ne istakne cjenovnik svojih proizvoda, odnosno usluga na način dostupan kupcima, odnosno korisnicima usluga i njih se ne pridržava (član 32. stav (1) tačka b) ovog zakona);
- g) na vidnom mjestu ne istakne radno vrijeme i ne pridržava ga se (član 32. stav (1) tačka c) ovog zakona);
- h) kupcu, odnosno korisniku usluga ne izda račun o prodatoj robi, odnosno izvršenim uslugama (član 32. stav (1) tačka d) ovog zakona);
- i) ne garantuje kvalitet proizvoda, odnosno usluga i ne otkloni nedostatke ili ne nadoknadi učinjenu štetu kupcu proizvoda, odnosno korisniku usluga u skladu sa važećim propisima i standardima (član 32. stav (1) tačka e) ovog zakona);
- j) ne vodi urednu evidenciju o obavljanju djelatnosti u skladu sa zakonom i drugim propisima koje donosi Federalno ministarstvo financija (član 32. stav (1) tačka f) ovog zakona);
- k) ne provodi propisane mjere zaštite na radu i zaštite okoline koje se odnose na obavljanje registrovane djelatnosti (član 32. stav (1) tačka g) ovog zakona);
- l) u određenom roku ne otkloni nedostatke utvrđene od nadležne inspekcije koji se odnose na navode izjave iz člana 15. stav (3) ovog zakona (član 86. stav (2) ovog zakona).

(2) Za prekršaj iz stava (1) ovog člana kaznit će se voditelj obrta, voditelj djelatnosti ili privremeni zaposlenik novčanom kaznom u iznosu od 500,00 KM do 1000,00 KM (član 28. stav (6), član 32. i član 49. ovog zakona).

### **Član 88.**

(1) Novčanom kaznom u iznosu od 2.000,00 KM do 4.000,00 KM kaznit će se za prekršaj obrtnik ili lice koje obavlja srodnu djelatnost ako:

- a) koristi rad drugih lica sa kojima nije zaključio ugovor o radu (član 3. stav (1) tačka b) ovog zakona);
- b) vodi obrt ili srodnu djelatnost u dodatnom zanimanju bez voditelja obrta (član 13. ovog zakona);
- c) ne prijavi promjenu naziva i oznake obrta ili srodne djelatnosti (član 20. stav (4) ovog zakona);
- d) ne prijavi promjenu sjedišta obrta ili srodne djelatnosti (član 21. stav (5) ovog zakona);
- e) obavlja obrt koji nije obuhvaćen obrtnicom, odnosno za koji nije dobio saglasnost za obavljanje obrta u slučaju obrta za koje je potrebna saglasnost (član 24. stav (1) ovog zakona);
- f) obavlja obrt ili srodnu djelatnost u izdvojenom prostoru bez rješenja nadležnog organa (član 27. stav (1) ovog zakona);
- g) vodi obrt ili srodnu djelatnost u izdvojenom prostoru bez voditelja obrta (član 28. stav (2) ovog zakona);
- h) vodi obrt ili srodnu djelatnost putem voditelja obrta bez rješenja nadležnog organa (član 28. st. (7) i (8) ovog zakona);
- i) obavlja obrt ili srodnu djelatnost za vrijeme privremene obustave obavljanja obrta (član 43. stav (5) ovog zakona);
- j) u predviđenom roku ne obavijesti nadležni organ o ponovnom početku obavljanja obrta ili srodne djelatnosti (član 43. stav (6) ovog zakona).

(2) Za ponovljene prekršaje iz stava (1) ovog člana obrtniku, odnosno licu koje obavlja srodnu djelatnost izreći će se zaštitna mjera zabrane obavljanja obrta, odnosno srodne djelatnosti u trajanju od tri do šest mjeseci.

#### **Član 89.**

(1) Novčanom kaznom u iznosu od 2.000,00 KM do 4.000,00 KM kaznit će se za prekršaj obrtnik ako obavlja obrt bez obrtnice, odnosno bez saglasnosti za obavljanje obrta (član 17. st. (1) i (2) ovog zakona).

(2) Novčanom kaznom u iznosu od 2.000,00 KM do 4.000,00 KM kaznit će se za prekršaj lice koje obavlja srodnu djelatnost bez odobrenja za obavljanje srodne djelatnosti (član 47. stav (2) ovog zakona).

(3) Za prekršaj iz st. (1) i (2) ovog člana izreći će se zaštitna mjera oduzimanja uređaja, proizvoda i opreme kojima je prekršaj izvršen, kao i nezakonito ostvarene dobiti.

#### **Član 90.**

Novčanom kaznom u iznosu od 1.000,00 KM do 3.000,00 KM kaznit će se za prekršaj odgovorno lice u nadležnom organu ako:

- a) u propisanom roku ne donese rješenje iz člana 17. stav (3) ovog zakona ili donese rješenje koje ne sadrži registarski list iz Obrtnog registra (član 18. stav (3) ovog zakona);
- b) u propisanom roku ne dostavi sva rješenja u vezi sa obavljanjem obrta nadležnim organima (član 23. ovog zakona);
- c) po službenoj dužnosti ne obavijesti obrtnika ili lice koje obavlja srodnu djelatnost o obavezi i rokovima usklađivanja poslovanja i potrebnoj dokumentaciji za usklađivanje poslovanja (član 91. stav (2) ovog zakona).

### **POGLAVLJE VIII - PRELAZNE I ZAVRŠNE ODREDBE**

#### **Član 91.**

##### **(Obaveza usklađivanja poslovanja)**

(1) Obrtnici, odnosno lica koja obavljaju srodne djelatnosti kojima je obavljanje djelatnosti odobreno prema ranijim propisima uskladit će svoje poslovanje sa odredbama ovog zakona u roku od godinu dana od dana stupanja na snagu ovog zakona.

(2) Nadležni organ prema sjedištu obrta ili srodne djelatnosti po službenoj dužnosti obavještava obrtnike i lica koja obavljaju srodne djelatnosti o obavezi i rokovima usklađivanja poslovanja sa ovim zakonom, kao i o potrebnoj dokumentaciji za usklađivanje.

(3) Obrtnici i lica koja obavljaju srodne djelatnosti koji su prema prijašnjim propisima osnovali radnju mogu nastaviti sa poslovanjem i ako vlasnik obrta ili srodne djelatnosti ne ispunjava uslove iz člana 11. stav (1) ovog zakona.

(4) Obrtnici i lica koja obavljaju srodne djelatnosti koji su prema prijašnjim propisima osnovali radnju putem zaposlenika mogu nastaviti sa poslovanjem ako i dalje imaju zaposlenika u skladu sa odredbama ovog zakona.

(5) Obrtnici i lica koja obavljaju srodne djelatnosti koji su prema prijašnjim propisima stekli odgovarajuću srednju stručnu spremu mogu obavljati obrte ili srodne djelatnosti utvrđene ovim zakonom ako sa danom početka primjene ovog zakona imaju odobrenje za rad.

(6) Obrtnicima koji su majstorski ispit položili prema propisima koji su važili do dana početka primjene ovog zakona isti se priznaje u cijelosti.

**Član 92.**  
**(Započeti postupci)**

Postupci započeti po propisima koji su važili do dana stupanja na snagu ovog zakona okončat će se po tim propisima.

**Član 93.**  
**(Obaveza donošenja Uredbe)**

Vlada FBiH će u roku od šest mjeseci od dana stupanja na snagu ovog zakona donijeti Uredbu o tradicionalnim i starim zanatima (član 9. stav (2) ovog zakona).

**Član 94.**  
**(Obaveza donošenja podzakonskih propisa)**

(1) Ministar će u roku od šest mjeseci od dana stupanja na snagu ovog zakona donijeti:

- a) Pravilnik o djelatnostima koje se mogu obavljati kao domaća radinost (član 5. stav (5) ovog zakona);
- b) Pravilnik o djelatnostima koje se mogu obavljati sezonski (član 6. stav (4) ovog zakona);
- c) Pravilnik o djelatnostima koje se mogu obavljati u stambenim prostorijama, te izvan poslovnih i stambenih prostorija (član 8. stav (2) ovog zakona);
- d) Pravilnik o obrtima (član 8. stav (3) ovog zakona);
- e) Pravilnik o minimalnim tehničkim i drugim uslovima koje moraju ispunjavati poslovni prostori (član 15. stav (8) ovog zakona);
- f) Pravilnik o sadržaju i obliku obrtnice, sadržaju i obliku saglasnosti za obavljanje obrta i sadržaju i obliku odobrenja za obavljanje srodne djelatnosti (član 17. stav (10) ovog zakona);
- g) Pravilnik o obliku i načinu vođenja Obrtnog registra (član 18. stav (5) ovog zakona);
- h) Pravilnik o sadržaju i obliku diplome o majstorskom zvanju (član 52. stav (4) ovog zakona)
- i) Pravilnik o polaganju majstorskog ispita i popis zanimanja za koja se može polagati majstorski ispit (član 52. stav (6) ovog zakona);
- j) Rješenje o cijeni polaganja majstorskog ispita (član 53. stav (2) ovog zakona);
- k) Pravilnik o visini i načinu raspodjele članarine između udruženja obrtnika i udruženja lica koja obavljaju srodne djelatnosti, kantonalnih komora i Komore (član 55. stav (5) ovog zakona);
- l) Pravilnik o izornoj proceduri u kantonalnim komorama i Komori (član 66. stav (3) ovog zakona).

(2) Kantonalni ministri nadležni za obrte iz stava (2) člana 17. ovog zakona u roku od šest mjeseci od dana stupanja na snagu ovog zakona donijet će Pravilnik o sadržaju, obliku i načinu vođenja Registra saglasnosti za obavljanje ovih obrta (član 17. stav (11) ovog zakona).

(3) Kantonalni ministri nadležni za oblast obrazovanja u roku od šest mjeseci od dana stupanja na snagu ovog zakona donijet će programe polaganja majstorskih ispita (član 51. stav (1) ovog zakona).

(4) Komora će u roku od šest mjeseci od dana stupanja na snagu ovog zakona donijeti Pravilnik o načinu provođenja izborne procedure u udruženjima obrtnika i

udruženjima lica koja obavljaju srodne djelatnosti (član 73. stav (1) tačka i) ovog zakona).

#### **Član 95.**

##### **(Primjena ranijih propisa)**

Do donošenja podzakonskih akata na osnovu ovog zakona primenjivat će se podzakonski akti doneseni na osnovu Zakona o obrtu i srodnim djelatnostima ("Službene novine Federacije BiH", br. 35/09 i 42/11), ako nisu u suprotnosti sa ovim zakonom.

#### **Član 96.**

##### **( Prestanak važenja)**

Danom stupanja na snagu ovoga Zakona prestaje važiti Zakon o obrtu i srodnim djelatnostima ("Službene novine Federacije BiH", br 35/09 i 42/11).

#### **Član 97.**

##### **(Stupanje na snagu)**

Ovaj Zakon stupa na snagu osmog dana od dana objavljivanja u "Službenim novinama Federacije BiH."

# OBRAZLOŽENJE

## I – PRAVNI OSNOV

Ustavni osnov za donošenje ovog zakona sadržan je u članu III.1. tačka b), koji je izmijenjen amandmanima VIII, LXXXIX i CVI, a u vezi sa članom IV. A. 20. (1) Ustava Federacije Bosne i Hercegovine ("Službene novine Federacije BiH", broj: 1/94), prema kojem je u isključivoj nadležnosti Federacije BiH utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou, a Parlament Federacije BiH, uz ostale nadležnosti predviđene Ustavom, odgovoran je za donošenje zakona o izvršavanju dužnosti federalne vlasti.

## II – CILJ DONOŠENJA ZAKONA

Cilj donošenja ovog zakona je razvoj i unaprijeđivanje obrta i srodnih djelatnosti, zaštita starih i tradicionalnih zanata i domaće radinosti.

## III – RAZLOZI ZA DONOŠENJE

Izradi Prednacrtu Zakona o obrtu i srodnim djelatnostima u Federaciji Bosne i Hercegovine pristupilo se nakon analize stanja na tržištu i sagledavanja problema sa kojim su se suočavali obrtnici, a naročito potrebe smanjenja sive ekonomije.

Zaključkom Vlade Federacije Bosne i Hercegovine, V.broj:82/2016 od 14.01.2016. godine, prihvaćena je Informacija Federalnog ministarstva razvoja, poduzetništva i obrta o Analizi stanja u oblasti obrta za period 2010 – 2014. godine i Ministarstvo se obavezalo da započne na izradi novoga Zakona o obrtu i srodnim djelatnostima.

Zaključkom Vlade Federacije Bosne i Hercegovine, V.broj: 1065/2016 od 13.05.2016. zadužen je federalni ministar razvoja, poduzetništva i obrta, da imenuje Komisiju sa zadatkom da uz podršku Grupacije Svjetske banke/Međunarodne finansijske korporacije (International Finance Corporation – IFC) izradi tekst Prednacrtu zakona o obrtu i srodnim djelatnostima.

Nakon izvršene analize stanja u obrtništvu ciljevi novih prijedloga Zakona odnose se na: ubrzavanje procesa registracije; preciziranje funkcije i značaja Obrtnog registra; obezbjeđenje primjene zakona u dijelu obrazovanja obrtnika i to kada je u pitanju polaganje majstorskog ispita; stvaranje uslova za vanjskotrgovinsko poslovanje obrtnika; usklađivanje završnih odredbi sa Zakonom o prekršajima.

U skladu sa članom 47. i 49. stav 1. tačka b) Pravila i postupaka za izradu zakona i drugih propisa u Federacije Bosne i Hercegovine ("Službene novine Federacija BiH", broj 71/14) Ministarstvo je pripremilo prednacrt novog Zakona o obrtu i srodnim djelatnostima imajući u vidu da se predložene izmjene odnose na 90 članova od 122 člana koliko ima osnovni Zakon, što je više od 50% izmijenjenih članova, a što je uslov za donošenje novoga propisa.

Višegodišnje iskustvo u primjeni Zakona o obrtu i srodnim djelatnostima ("Službene novine Federacije BiH", br.: 35/09 i 42/11) pokazalo je da zakonska rješenja utvrđena ovim zakonom imaju značajne manjkavosti, zbog čega se i pristupilo studioznoj analizi i izradi Nacrtu zakona o obrtu i srodnim djelatnostima, kao propisu koji će pored uspostavljanja i obavljanja obrta regulisati i odredbe o vrstama i prenosu obrta, te nadležnostima obrtničkih komora, kao i sve ostale mjere koje su nezaobilazne kada je u pitanju obrtnička djelatnost. Razlog za izradu novog Zakona o obrtu i srodnim djelatnostima Federacije Bosne i Hercegovine, između ostalog je i

obaveza prilagođavanja domaćih zakona propisima Evropske Unije, ali i temeljita promjena tretmana obrtnika u domaćoj administrativnoj praksi.

Obrtnici predstavljaju važan segment privrede u Federaciji BiH, te je Federalno ministarstvo razvoja, poduzetništva i obrta, kao obrađivač zakona, stanovišta da će predloženo zakonsko rješenje značajno doprinijeti unapređenju obrtničke djelatnosti, povećanju efikasnosti sistema, boljoj koordinaciji opštinskih, kantonalnih i FBiH vlasti, svrsishodnijem trošenju sredstava, smanjenju troškova fizičkim licima i povećanju zaposlenosti. Nacrt zakona o obrtu i srodnim djelatnostima Federacije BiH sa predloženim zakonskim rješenjima ima za cilj da doprinese suzbijanju sive ekonomije i jačanju tržišta. Obrtnici su pokretač ekonomije i neophodno je osigurati moderan i efikasan okvir za njihovo poslovanje, te podsticati jačanje obavljanja obrtničke djelatnosti. Predviđenim rješenjima pojednostavljeni su postupci za registraciju i rad obrtnika u Federaciji BiH, čime bi se moglo ostvariti značajne uštede privatnom sektoru na godišnjem nivou. Znatno je ubrzano provođenje procedura i postupaka obuhvaćenih ovim zakonom, odnosno potrebno vrijeme je reducirano za 50%. Također, unaprijeđen je postupak razmjene informacija, te način vođenja Obrtnog registra i riješeno pitanje ažuriranja podataka u ovom registru.

#### **IV – PREGLED I SADRŽAJ NAJZNAČAJNIJIH PRAVNIH RJEŠENJA**

Zakon o obrtu i srodnim djelatnostima je podijeljen na VIII Poglavlja:

##### **I – OPŠTE ODREDBE (član 1. – član 9.)**

U opštim odredbama zakona propisan je predmet, cilj i načela zakona, definicije pojedinih pojmova koji se upotrebljavaju u zakonu i njihova značenja (obrt, obrtnik, srodne djelatnosti, proizvodnja, usluge, obrtnica, Obrtni registar, Registar saglasnosti za obrte koji su regulisani posebnim zakonskim propisima), kao i ravnopravnost polova u korištenju ovog zakona. Definisano je da je domaća radinost djelatnost izrade i dorade predmeta kod kojih preovlađuje ručni rad i usluge u domaćinstvu, da se obavlja samostalno ili uz pomoć članova zajedničkog domaćinstva, da u tu kategoriju spadaju određeni obrti i srodne djelatnosti za čije obavljanje se ne traži odgovarajuća stručna sprema, da se upisuje se u Obrtni registar i da na prijedlog kantonalnih ministarstava nadležnih za obrt federalni ministar razvoja, poduzetništva i obrta propisuje djelatnosti koje se mogu obavljati kao domaća radinost. Obrađen je institut sezonskog obavljanja obrta, dužina njegovog obavljanja i obaveza upisa u Obrtni registar, te da na prijedlog kantonalnih ministarstava nadležnih za obrt federalni ministar razvoja, poduzetništva i obrta propisuje djelatnosti koje se mogu obavljati sezonski. Definisana je dopuštena i pretežna djelatnost. Propisani su uslovi za obavljanje obrta u pogledu stručne spreme, obaveza federalnog ministra razvoja, poduzetništva i obrta da pravilnikom propiše djelatnosti koje spadaju u obrte, kao i da na prijedlog kantonalnih ministarstava nadležnih za obrt propiše uslove pod kojima se mogu obavljati i popis djelatnosti koje se mogu obavljati u stambenim prostorijama, te izvan poslovnih i stambenih prostorija. Posebno su regulisani tradicionalni i stari zanati za koje je propisana obaveza poznavanja zanatskih vještina, kao i pretežan udio ručnog rada. Utvrđena je obaveza Vlade FBiH da, na prijedlog federalnog ministra razvoja, poduzetništva i obrta, a po prethodno pribavljenom mišljenju jedinica lokalne samouprave, sačini popis tradicionalnih i starih zanata. Također je predviđena mogućnost da federalna i kantonalne vlade, kao i jedinice lokalne samouprave propišu posebne olakšice za obavljanje tradicionalnih i starih zanata, svako iz svoje nadležnosti.

## **II – OBAVLJANJE OBRTA (član 10. – član 45.)**

Zakonom su propisani opšti uslovi za obavljanje obrta kao osnovnog, dopunskog ili dodatnog zanimanja, te posebni uslovi (uslovi stručne spreme, mogućnost vođenja obrta putem voditelja obrta ako ne ispunjava uslov stručne spreme, zdravstveni uslovi, obavljanje obrta od strane fizičkih lica s odgovarajućim obrazovanjem višim od propisanog, obavljanje obrta od strane fizičkih lica – izumitelja na osnovu ostvarenog patentnog prava za patentirani proizvod ili uslugu), kao i uslovi za obavljanje obrta koji se odnose na strane državljane. Utvrđeni su minimalni i drugi propisani uslovi u pogledu prostora i opreme za obavljanje obrta, što detaljnije pravilnikom propisuje federalni ministar razvoja, poduzetništva i obrta, te regulisan način utvrđivanja njihove ispunjenosti – izjavom obrtnika i inspeksijskom pregledom. Definisana je i odgovornost obrtnika u slučaju davanja neistinite izjave, kao i odgovornost inspekcije u slučaju davanja odobrenja za obavljanje djelatnosti bez ispunjavanja propisanih uslova ili nepoštivanja propisanih rokova za inspeksijski nadzor.

Nadležnost za provođenje zakona prenesena je na opštinske, odnosno gradske organe nadležne za obrt, a za obavljanje obrta propisana obaveza posjedovanja obrtnice i saglasnosti za obavljanje obrta, ukoliko se radi o djelatnostima koje su propisane posebnim zakonskim propisima. Skraćena je i pojednostavljena procedura otvaranja obrta shodno kojoj nadležni organ u roku od sedam dana od dana prijema urednog zahtjeva donosi rješenje kojim se odobrava obavljanje obrta i upis u Obrtni registar, dok za obavljanje obrta koji su propisani posebnim zakonskim propisima nadležno kantonalno ministarstvo izdaje saglasnost u roku od sedam dana od dana prijema urednog zahtjeva i isto upisuje u Registar saglasnosti. Sadržaj i oblik obrtnice, sadržaj i oblik odobrenja za obavljanje srodne djelatnosti i sadržaj i oblik saglasnosti za obavljanje obrta propisuje federalni ministar razvoja, poduzetništva i obrta, dok oblik i sadržaj Registra saglasnosti za obrte koji su propisani posebnim zakonskim propisima propisuje kantonalni ministar nadležan za obrt.

Upis u Obrtni registar, putem popunjavanja registarskog lista, koji je sastavni dio rješenja o odobravanju obavljanja djelatnosti, vrši nadležni opštinski, odnosno gradski organ, a pristup Obrtnom registru koji vodi federalno ministarstvo razvoja, poduzetništva i obrta, nadležni organ ostvaruje preko korisničkog imena i šifre koje mu dodjeljuje to ministarstvo. U cilju javnosti podataka ministarstvo će omogućiti svim zainteresovanim licima elektronsku pretragu i pregled podataka koji su predmet registracije, a federalni ministar razvoja, poduzetništva i obrta će propisati oblik i način vođenja Obrtnog registra, kao i mogućnosti njegovog korištenja.

Ukoliko nadležni organ ne izda rješenje u propisanom roku obrtnik može, ukoliko je podnio ovjerenu pisanu izjavu o ispunjenosti uslova, započeti sa obavljanjem obrta o čemu je dužan prethodno pisanim putem obavijestiti nadležni organ koji je dužan u roku od 15 dana donijeti rješenje i upisati obrt u Obrtni registar. Definisana je firma obrta, njen sadržaj i promjena iste, te sjedište obrta i procedura promjene sjedišta. Propisan je rok od devedeset dana od dana izdavanja obrtnice za početak obavljanja djelatnosti, uz rok od osam dana za obavještanje o početku rada, od kojeg momenta počinju teći prava i obaveze obrtnika.

Nadležni organ dužan je nakon upisa u Obrtni registar sva rješenja u vezi sa obavljanjem obrta u roku od tri dana od dana upisa dostaviti: obrtniku, nadležnom poreskom organu, nadležnim inspeksijskim organima, obrtničkoj komori kantona, nadležnom fondu zdravstvenog i penzijskog osiguranja, nadležnoj službi za zapošljavanje i Federalnom zavodu za statistiku.

Uređeno je poslovanje obrta upisivanjem djelatnosti u obrtnicu, uz pojednostavljenje da, ukoliko djelatnost za koju se traži osnivanje obrta nije predviđena važećim propisima, nadležni organ će odlučiti o upisu bliže određujući djelatnost i njenu pripadnost postojećim djelatnostima u skladu sa važećom klasifikacijom djelatnosti.

Značajna novina u zakonu je da obrtnik može obavljati registrovane djelatnosti u vanjskotrgovinskom poslovanju, u skladu sa propisima kojima se uređuje vanjskotrgovinska politika.

Predviđeno je da obrtnici promet svojih proizvoda mogu obavljati i izvan sjedišta i izdvojenog poslovnog prostora kada je po prirodi same djelatnosti takvo prometovanje moguće ili uobičajeno.

Obrt kao osnovno ili dodatno zanimanje može se obavljati u više izdvojenih prostora koji se nalaze u sjedištu ili izvan sjedišta obrta, a poslovni prostor može biti stalni, privremeni ili pokretni. O obavljanju obrta u izdvojenom prostoru nadležni organ izdaje rješenje i upisuje izdvojeni prostor u Obrtni registar.

Uveden je institut voditelja obrta ukoliko obrtnik ne obavlja obrt samostalno, odnosno ukoliko se obrt obavlja u izdvojenom poslovnom prostoru, što nadležni organ utvrđuje rješenjem i upisuje u Obrtni registar. Propisane su dužnosti obrtnika, voditelja obrta, radnika i privremenog radnika, kao i pomaganje u obavljanju obrta od strane članova porodičnog domaćinstva.

Još jednu novinu u zakonu predstavlja ograničavanje odgovornosti obrtnika cjelokupnom svojom imovinom u smislu Zakona o izvršnom postupku, prema kojoj se izvršenje radi ostvarenja novčanog potraživanja protiv obrtnika ne može provesti na onim stvarima i pravima na kojima se protiv njega ne bi mogla provesti kad ne bi obavljao privrednu djelatnost, te na onim stvarima i pravima koja su nužna za obavljanje njegove privredne djelatnosti ako mu je ona osnovni izvor sredstava za život, kao i na nekretnini u kojoj izvršenik stanuje u obimu nužnom za zadovoljavanje osnovnih stambenih potreba izvršenika i lica koja je po zakonu dužan izdržavati.

Uređen je prenos obrtnice i to u slučaju smrti obrtnika, gubitka poslovne sposobnosti obrtnika ili ostvarivanja prava na starosnu penziju. Na ovaj način izbjegava se vođenje postupaka registrovanja zajedničkih obrta, istupanja ortaka koji ostvaruje pravo na penziju i upis nastavka samostalnog vođenja obrta po nasljedniku. Produžen je rok za podnošenje zahtjeva za odobrenje za nastavak vođenja obrta nakon smrti obrtnika do prenosa obrtnice na 60 dana.

U okviru instituta zajedničko obavljanje obrta uvedeno je ograničenja broja do najviše deset fizičkih lica koja mogu zajednički obavljati obrt, uz uvođenje mogućnosti da jedno fizičko lice može obavljati više zajedničkih obrta.

Takođe je uređeno i privremeno obustavljanje obavljanja obrta, te preciznije određen prestanak obavljanja obrta objavom i po sili zakona.

### **III – OBAVLJANJE SRODNIH DJELATNOSTI (član 46. – član 49.)**

Propisani su uslovi za obavljanje srodnih djelatnosti, te je po ugledu na otvaranje obrta, skraćen i pojednostavljen postupak izdavanja odobrenja za obavljanje srodnih djelatnosti, kao i upis srodnih djelatnosti u Obrtni registar.

Poslovanje srodnih djelatnosti, obavljanje srodnih djelatnosti putem voditelja djelatnosti, prenos srodnih djelatnosti, zajedničko obavljanje srodnih djelatnosti, privremena obustava i prestanak obavljanja srodnih djelatnosti vrše se u skladu sa odredbama kojima je propisan način poslovanja obrta, obavljanje obrta putem voditelja obrta, prenos obrta, zajedničko obavljanje obrta, privremena obustava i prestanak obrta.



#### **IV – OBRAZOVANJE I OSPOSOBLJAVANJE ZA OBAVLJANJE OBRTA I SRODNIH DJELATNOSTI (član 50. – član 53.)**

Zadržana su rješenja iz postojećeg zakona o majstorskom ispitu, uslovima za polaganje majstorskog ispita i programu izvođenja, komisiji za polaganje majstorskog ispita, troškovima polaganja i nadzoru nad provođenjem ispita, imajući u vidu ustavnu nadležnost kantona u oblasti obrazovanja. Uvedeno je novo rješenje da se obrazovanje za obavljanje djelatnosti za koje se traži odgovarajuća školska sprema pored osnovnih, srednjih škola i visokoškolskih ustanova, može vršiti i u ustanovama za obrazovanje odraslih u skladu sa kantonalnim zakonima o obrazovanju odraslih.

#### **V – ORGANIZOVANJE OBRTRNIKA I LICA KOJA OBAVLJANJU SRODNE DJELATNOSTI (član 54. – član 82.)**

U pogledu organizovanja obrtnika i lica koja obavljaju srodne djelatnosti izvršena su nomotehnička usklađivanja u odnosu na postojeći zakon, kao i određena pojednostavljenja u okviru jedinstvenog sistema organizovanja obrtnika.

U navedenom smislu predviđeno je da područje na kojem može biti osnovano jedno udruženje obrtnika ovlašteno da nosi oznaku u vezi sa obrtom za koji je osnovano, obuhvata područje jedne ili više jedinica lokalne samouprave na teritoriju jednog kantona. Navedeno zakonsko rješenje omogućava formiranje udruženja sa većim kapacitetima za unapređivanje, usklađivanje i ostvarivanje zajedničkih interesa, kao i mogućnost da u slučaju kada na području jedne opštine ili grada nema dovoljan broj obrtnika i lica koja obavljaju srodne djelatnosti za formiranje udruženja, obrtnici odnosno lica koja obavljaju srodne djelatnosti mogu osnovati udruženje u okviru teritorijalnog obuhvata više jedinica lokalne samouprave.

Također, uz prethodno navedeno zakonsko rješenje, pojednostavljen je i jedinstveni komorski sistem ukidanjem instituta – opšte udruženje – čije je postojanje dominantno uslovljeno nedovoljnim brojem obrtnika i lica koja obavljaju srodne djelatnosti na području samo jedne opštine ili grada.

Zadržana su zakonska rješenja o članstvu, visini i načinu raspodjele članarine između udruženja obrtnika i udruženja lica koja obavljaju srodne djelatnosti, obrtničkih komora kantona i Obrtničke komore Federacije Bosne i Hercegovine, kao i rješenje o kontroli naplate članarine.

Odredbe o organima udruženja, njihovim nadležnostima, statutu i drugim pitanjima od značaja za rad udruženja su pojednostavljene na način da se predviđa odgovarajuća primjena odredbi ovog zakona kao i Zakona o udruženjima i fondacijama, na koji način se uspostavlja veća konzistentnost jedinstvenog sistema organizovanja obrtnika, te doprinosi jačanju slobode udruživanja.

Pojednostavljene su odredbe koje regulišu organizaciju i rad obrtničkih komora kantona, sa manjim stepenom normiranja i analognom primjenom odredbi ovog zakona i opštih aktata federalne obrtničke komore što doprinosi preglednosti, razumljivosti zakona, te jedinstvu komorskog sistema (npr. sadržaj statuta, odredbe kojima se regulišu uspostavljanje fonda uzajamne pomoći, ciljevi, akti i organi upravljanja itd.)

#### **VI – UPRAVNI NADZOR (član 83. – član 86.)**

Upravni nadzor nad provođenjem ovog zakona i propisa donesenih na osnovu ovog zakona vrši federalno inistarstvo razvoja, poduzetništva i obrta. Upravnom nadzoru doprinosi i činjenica efikasnijeg rada Obrtnog registra koji za cilj ima uvođenje reda u oblasti obrtništva, te pogoduje smanjenju sive ekonomije u okviru zakonom

definisane obrtničke djelatnosti. Inspeksijske poslove u provedbi ovog zakona i propisa donesenih na osnovu ovog zakona vrše nadležne inspekcije koje sva akta koja donesu dostavljaju nadležnim organima radi kontrole i utvrđivanja prestanka rada po sili zakona.

Utvršeni su načini postupanja u slučajevima obavljanja djelatnosti bez obrtnice, saglasnosti ili odobrenja, kao i u slučaju neispunjavanja minimalnih uslova.

#### **VII – PREKRŠAJNE ODREDBE (član 87. – član 90.)**

U prekršajnim odredbama, izvršeno je usklađivanje sa Zakonom o prekršajima. Nacrtom zakona utvrđeni su viši početni iznosi novčanih kazni za prekršaje utvrđene zakonom. Svrha kazni koje su predviđene Nacrtom zakona jeste prvenstveno u sprečavanju počinjenja prekršaja, te je to bio razlog za strožije novčane kazne za prekršaje utvrđene odredbama Nacrta zakona u odnosu na visinu novčanih kazni utvrđenih u ranijem Zakonu o obrtu i srodnim djelatnostima Federacije BiH. Predviđena je i prekršajna odgovornost voditelja obrta, voditelja djelatosti i privremenog radnika.

U odnosu na postojeći zakon uvedene su novine u prekršajnom kažnjavanju odgovornog lica u nadležnom organu u slučajevima kada ne donese rješenje u propisanom roku ili donese rješenje koje ne sadrži registarski list iz Obrtnog registra, ne dostavi sva rješenja u vezi sa obavljanjem obrta nadležnim organima u propisanom roku ili po službenoj dužnosti ne obavijesti obrtnika ili lice koje obavlja srodnu djelatnost o obavezi i rokovima usklađivanja poslovanja i dokumentaciji potrebnoj za usklađivanje poslovanja.

#### **VIII – PRELAZNE I ZAVRŠNE ODREDBE (član 91. – član 97.)**

U prelaznim i završnim odredbama utvrđeni su obaveza i način usklađivanja poslovanja sa novim zakonom u roku od godinu dana od stupanja na snagu novog zakona, te izuzeci od odredbi novog zakona. Takođe su utvrđeni rokovi za donošenje podzakonskih akata, te da će se do donošenja podzakonskih akata utvrđenih ovim zakonom, primjenjivati podzakonski akti doneseni na osnovu Zakona o obrtu i srodnim djelatnostima ("Službene novine Federacije BiH" br. 35/09 i 42/11) ako nisu u suprotnosti sa ovim zakonom.

Stupanjem na snagu ovog zakona prestaje da važi Zakon o obrtu i srodnim djelatnostima („Službene novine Federacije BiH“ br.35/09 i 42/11).

#### **V – FINANSIJSKA SREDSTVA ZA PROVOĐENJE OVOGA ZAKONA**

Za provođenje ovoga zakona nije potrebno obezbijediti dodatna sredstva iz Budžeta Federacije Bosne i Hercegovine osim redovnih sredstava utvrđenih Programom i planom rada Federalnog ministarstva razvoja, poduzetništva i obrta.